

續清十八史略讀本

宮脇通赫編次

五

リ 8
1468
5 ㇿ



門伊8
號 1468
卷 5



續十八史畧讀本卷之五

伊豫 宮脇通赫 編次

清下

康熙帝

鄭芝龍 誅

吳三桂 征

聖祖仁皇帝諱玄暉。世祖第三子。母皇后佟氏也。上舉止端肅。志量恢宏。語出至誠。切中事理。讀書十行俱下。畧不遺忘。自五歲後。好學不倦。世祖太漸立為皇太子。遺詔內大臣索尼。蘇克薩哈。遏必隆。鰲拜為輔佐。保翊冲主。贊理政務。○鄭芝龍并其子鄭世恩。鄭世蔭等。照謀叛例族誅。○壬寅。康熙元年。二月。吳三桂奏于十八年十一月進兵征緬。會師木邦。偽晉王李定國。奔景線。偽鞏昌王白文選

續十八史畧讀本卷之五



吳三桂執
明帝申榭

遁據錫波江官兵造筏將渡文選復奔茶山官兵追及文
選降三桂愛星阿自趨緬城緬酋恭應時執偽永曆朱由
榔獻軍前殺偽華亭侯王維恭等一百餘人吳三桂等班
師○四川總督李國英擒偽石泉王朱聿鎔復兩郡○
五月濟席哈平山東賊○總兵許龍擒海寇鄭成功之弟
鄭成賜于廈門○六月耿繼茂報海寇鄭成功因其子鄭
錦為各偽鎮擁立忿怒發狂于五月初八日齧指身死○
十月定西將軍內大臣公愛星阿凱旋○雲撫袁懋功報
偽晉王李定國逃奔景線染病身死○十一月授偽鞏昌
王白文選為承恩公○諭貴州一切文武官員兵民事務

天鼓鳴

俱照雲南例著平西王管理○癸卯二年二月京師天鼓
鳴隨隕星十一次朝拾視熱如熾炭○川賊偽岐侯賀珍
偽富寧伯賀道寧等納款○四月遼陽起黑風一股從南
向東吹倒民房四百三十餘間壓死男婦五百餘口○八
月以流賊餘孽郝搖旂劉體純李來亨等竄伏鄂襄山中
命都統穆卑瑪率太兵征勦○十月川督李國英報巨寇
劉一虎李來亨郝搖旂袁宗第党守素塔天寶馬騰雲七
家出犯平山乞發太兵勦滅○十二月耿繼茂李率泰奏
十月臣等統兵渡海攻克廈門賊眾驚潰登州提督施琅
會荷蘭國夾板船邀擊之斬千餘級乘勝取浯嶼金門二

克廈門

續資治通鑑長編卷之五

島鄭錦周全斌等遁。○李國英杜敏等進勦蜀中賊劉二
虎勢窮自縊郝搖旂袁宗第夜遁杜敏等追擊大敗於郝
搖旂袁宗第並偽晉王朱宗漢等於音琴與擒同○甲辰三年二
月耿繼茂疏官兵攻克長腰東蚶二島偽兵部阮春雷逆
渠張煌言僅以身免。○西山巨逆馬騰雲黨守素塔夫寶
歸誠。○三月耿繼茂與都督李率泰提督王進功等領兵
先後至八尺門偽將軍翁永多率兵民降渡海進拔銅山
降偽侯黃廷偽都督金寬等鄭錦遁走台灣。○八月浙督
趙廷臣疏逆渠張煌言盤踞浙海多年抗不就撫借名歸
隱徜徉海外臣密令守備徐元張扮成僧民獲活口林生

擒逆渠張
煌言

陳滿等知煌言現在懸山花界即駕所獲賊艘乘夜進小
港從山後覓路突入帳房遂擒煌言及其親信。○李來亨
擁眾茅麓山最為峻險靖西將軍穆里瑪定西將軍圖海
等率禁旅與三省兵合勦晝夜環攻李來亨窮迫自縊舉
火焚巢餘黨蕩平。○十一月吳三桂與總兵劉之復李世
輝等統滇十鎮兵由畢節七星關入分兵扼大方令提督
李本深統貴州四鎮兵由大方之六歸河會勦而屯糧于
三竿河首尾夾攻水西土司安坤檄中誤書六歸為陸廣
于是本深兵及黔蜀糧盡屯陸廣三路聲息隔絕安坤悉
眾邀戰三桂糧盡援隔受困兩月適本深擒賊謀訊知其

檄中誤書
受困

狀即整兵赴援圍乃解大破賊於波羅等追擊至法地屯

擒土司安坤滇在雲南之北貴州之西隸雲南省水西地名在滇之西北王司令土酋司其地之名漢

書所謂西南夷君長者是也宋為羈縻州在元為宣慰

宣撫招討安撫長官等土司其受地遠自周漢迄自唐宋

暹羅國進貢

而元明賞功授地之上府土州縣亦錯出其間○乙巳四年二月吳三桂報官兵

克烏撒土酋安重聖就擒烏撒亦水西地方○暹羅國主遣使具

表進貢○四月武林富陽縣太平村風日晴朗于巳刻晦

黑有石墮地聲如雷折為二重數百斤○丙午五年三月

吳三桂報勦土司祿昌賢于隴箐取寨數十迤東土賊俱

平設開化府永定州○丁未六年四月江南奸民沈未甫

等偽撰逆詩二卷乘市○五月諭吏部等衙門民為邦本

必使家給人足安生樂業方可稱太平之治近聞直隸各

省民多失所疾苦顛連深可憫念或係官吏貪酷剝窮

黎抑或法制未便致民失業果何道以遂其生耶一切民

生利病應行應改爾內外各衙門大小文武等官各抒所

見毋隱○已酉八年五月內大臣鰲拜有罪上諭曰鰲拜

以勲舊大臣受恩深重皇考遺詔輔佐政務理宜精白乃

心盡忠圖報不意結黨專權紊亂國政紛更成憲罔上行

私朕久已悉知尚望其改行從善克保功名以全終始乃

近觀其罪惡日多命諸王大臣公同究審俱已得實以所

犯重大擬以正法當依擬處分但念鰲拜在累朝効力年

籍沒 齋拜革職 人必先心 術

久且皇考曾經倚任朕不忍加誅姑從寬革職籍沒○上

諭講官曰人必先心術次才學心術不善縱有才學何用

○平南主尚可喜疏請撤藩歸老遼東先是尚可喜老病以兵事屬其子之

信後為之信所制至是用上命部議遂令其盡撤藩兵回

籍初部臣奏計際南省俸餉歲九百餘萬議裁管兵五萬

以自固加以閩粵二藩運餉歲需二千餘萬近省輓輸不

給一切仰諸江南則連章入告既贏不復請督核天下

財賦半耗于三藩御史郝浴等奏○七月平西主吳三桂

勅其不法而朝廷固懷之以德

靖南王耿精忠疏請撤藩先是吳三桂以日疾既辭總管

以功高朝廷終不奪我藩益固根蒂為不可拔盡枯沐氏

舊莊七百頃為藩莊通使達賴刺麻互市茶馬假濬渠築

城為名廣徵關市權鹽井開礦鼓鑄鑄積硝磺諸禁物重

斂土司金幣厚自封殖散財結士人人得其死力專制滇

中十餘年水陸衝要備置私人各省提鎮多其腹心子為

額駙朝政且夕馳報常挾邊防以自重至是吳三桂及耿

精忠聞撤尚可喜藩俱不自安乃為此請以探朝旨○差禮部侍郎折爾肯往雲南

戶部尚書梁清標往廣東吏部侍郎陳一炳往福建經理

各藩撤兵上以吳三桂耿精忠撤藩之請勅廷臣議皆言

費不如此勿徒惟戶部尚書米思翰等力請從藩議政王貝

勒大臣仍持兩議不決上念藩鎮久握重兵勢成尾大非

國家利又三桂子精忠諸弟皆宿衛京師○十一月平西

諒無能為變特允其請從藩山海關外

王吳三桂反三桂雖請撤藩意竊期朝廷慰留如明沐英

陰勒士馬禁過郵傳及侍郎折爾肯至三桂陽拜詔而屢

遷行期反謀益急諒中朝諸將無足當已者惟難于舉兵

之名欲立明後以號召天下則緬甸之役無可自解欲行

至中原據腹心始舉事復恐日久謀泄至是遂發兵反

殺巡撫朱國執按察使以下之不屈者移檄遠近自稱天

下

下

楊起隆謀叛

下都招討兵馬太元帥以明年甲寅為周王元年鑄錢曰
 利用通寶蓄髮易衣寇禮儀復舊旗幟皆白貴州巡撫曹
 申吉提督李本深雲南提督張國柱皆從焉雲貴總督甘
 文焜在貴陽聞變欲拒守而督標兵皆不為用疾馳至鎮
 遠為賊所遮死之賊逼鎮遠漸入楚境變報至京舉朝震
 動大學士索額圖請誅諸臣之建議徹藩者上不許乃停
 撤平南靖南二藩○奸民楊起隆糾黨謀叛約于京城內
 外放火舉事潛聚降將周全斌家全斌之子公直首于都
 統祖永烈永烈率兵圍之生擒其黨偽齊有親王焦二偽
 指揮朱尚賢偽閣老張大偽軍師李柱等數百人皆磔于

市場起隆逃去○遣都統巴爾布等率滿州精騎三千由
 荊州守常德都統珠滿以兵三千由武昌赴守岳州都督
 尼雅翰赫葉席布根特穆占修國瑤等分馳西安漢中安
 慶兗州鄖陽汝寧南昌諸要地聽調遣削吳三桂官爵宣
 示中外下其子應熊及家屬于獄○諭京民勿驚動○命
 順承郡主勒爾錦為寧南靖寇太將軍統師至荊州瓦爾
 喀為西安將軍率兵赴蜀大學士莫洛經略陝西吳三桂
 亦遣其將王屏藩犯四川馬寶等出貴州湖南陷沅州○
 甲寅十三年正月賊將龔應麟夏國相張國柱等軍至湖
 南提督桑額自澧州走夷陵巡撫盧震奔長沙○二月

耿精忠反

珠滿等至荊州武昌畏賊勢盛不敢進於是常德長沙岳
 澧衡等州先後陷賊襄陽總兵楊嘉來以襄陽應賊廣西
 將軍孫延齡提督馬雄以桂林應賊四川巡撫羅森提督
 鄭蛟麟總兵譚洪吳之茂以四川應賊靖南王耿精忠聞
 之亦舉兵反數月而六省皆陷三桂以疏付折爾肯等還
 奏而親赴常澧督戰驅土司苗獮助軍鋒伐黔楚山水造
 樓船巨艦轉川湖之粟以餉軍廣餌賊黨號召天下賊將
 吳應麒踞岳州于城外濬濠三重設陷坑鹿角以拒步騎
 於洞庭峽口攢立梢樁以拒巨艦澧州石首華容松滋皆
 布重兵為犄角我兵雲集荊襄武昌宜昌諸郡無敢渡江

西洋人南懷仁製火礮

櫻其鋒者○察哈爾科爾沁諸蒙古各請出兵馬從征討
 賊○命西洋人南懷仁多製輕便火礮俾越山渡水以利
 行軍之用○西藏達刺喇嘛遣使奏言吳三桂若窮蹙乞
 降可宥其死倘竟鳴張不若裂土罷兵上嚴斥不許○吳
 三桂以荆楚大兵扼其前乃使其將分道一由長沙窺江
 西一由四川窺陝西其江西賊入袁州陷萍鄉安福上高
 與耿逆之兵合陷三十餘城○四月吳三桂子應熊伏誅
 ○以賴塔為平南將軍統兵討耿精忠根特巴圖魯為平
 寇大將軍討孫延齡○尚可喜執吳三桂使人並以逆書
 奏聞仍言臣衆子中惟之孝堪繼臣職至軍機事宜雖衰

老尚能指揮調度不致有悞封疆上嘉獎封可喜平南親
王授之孝平南將軍○命貝勒尚善為安遠靖寇大將軍
助順承郡王分討岳州賊安親王岳樂為遠平靖寇大將
軍出江西以簡親王喇布為揚威大將軍統師鎮江南貝
勒洞鄂為定西大將軍與莫洛由陝攻蜀康親王傑書為
奉命大將軍貝子傅喇塔為寧海將軍由浙討閩且諭岳
樂以湖南一隅四方群寇所觀望今荆兵未能渡江岳州
城堅難驟進宜由袁州直取長沙長沙一破賊勢瓦解荆
州大兵即可乘機進攻○六月遣郎中周襄緒等往福建
招諭耿精忠○總兵祖宏勳以溫州叛○耿精忠偽將李

王輔臣反

雲龍犯常山開化金華副將牟木寅擊敗之斬其偽將張
雄○八月海澄公黃梧卒子芳度偽降賊募舊兵斬賊將
劉豹等固守漳城遣間使以聞且請速救詔褒之令襲父
爵以其兄侍衛黃芳世為隨征福建總兵官令同尚可喜
進勦○流賊張獻忠餘黨冉秉乾等投誠○閩賊踞建昌
滇賊西犯袁州令哈爾哈齊援袁州○十二月陝西提督
王輔臣叛初西安將軍瓦爾喀等兵已克復漢中進抵保
寧賊將王屍藩出兵斷我餉運劫糧艘于略陽截陸運于
棧道于是保寧之師退至廣元缺餉兩月總兵王懷忠標
兵四千潰散提督王輔臣陰生異志遂唆其眾二千譟餉

攻莫洛于寧羌。賊之降附于三桂。先是莫洛統兵先行而具子洞鄂率滿騎繼進。洞鄂遲延繞道。致經畧孤軍遇變。及王輔臣所部兵逃散過半。輔臣僅與數百人走秦州。洞鄂復不躡擊。徑回西安。致輔臣得據平涼。而漢中復陷于賊。三桂聞之急。給輔臣犒師銀二十萬。又令蜀將王屍藩、吳之茂由漢中出隴西。援應土寇羌番蠶起。所在應賊。耿精忠遣使至臺。請濟師。海徵總兵趙得勝與將士議奉鄭經。經以陳永華為留守。總制率侍衛馮錫範、陳繩武等渡海而西。授得勝興明伯左都督。自經東遷。偃武息民。兵甲鈍敝。船不滿百。軍不滿萬。精忠頗易之。經遣人說精忠

借漳泉二府為召募。精忠難之而不報。于是耿鄭交惡。經進取同安。守將張學堯降。精忠懼以王進功守泉州。進功子藩錫誘殺泉州城主賴主。兵民多從藩錫者。遂逐進納款于經。經乃入泉州。授藩錫指揮使。盡委國事。官兵圍潮州府。守將劉進忠告急。精忠不能救。進忠納款于經。經遣舟師援之。以進忠為定虜伯。前提督。精忠命進功取泉州。經命將士敗進功于塗嶺。追至興化而還。吳三桂禮曹周文驥使經平耿鄭。○乙卯十四年正月。命將軍阿密達等帥師赴蘭州。討王輔臣。洞鄂及總督哈占等皆留兵西安。不遣。于是秦州蘭州鞏昌定邊靖邊臨洮慶陽綏德延安

察哈爾文

花馬池等郡縣相繼失。輔臣自踞平涼，使其黨分據各郡。隴右皆陷于賊。惟甘肅提督張勇總兵孫思克、王進等力挫賊鋒，故洞鄂等諸將復秦州，進攻平涼。張勇遣兵復蘭延鞏諸郡，自守鞏昌秦州，以隔蜀賊隴賊相通之路。蜀賊吳三桂隴賊詔以張勇為靖逆將軍，便宜行事。○三月，察哈爾布爾尼叛，以多羅信郡王鄂札為撫遠大將軍，大學士圖海為副將軍討平之。○四月，護軍統領郎肅等勦湖寇於五桂寨，斬二萬餘級，復餘于縣。○叛將楊來嘉犯南漳，尋陷穀城，以貝勒察尼為靖寇將軍，統襄陽諸路兵援穀城。○八月，董額畢力克圖阿密達諸軍會攻王輔臣于平涼。

何祐大破尚可喜兵

屢敗之，陣斬賊將郝天祥。○十月，陝西官兵及王輔臣戰于固原，失利。副將木必圖死之。提督陳福退保靈州。○海寇鄭經陷彰州，海澄公黃芳度死之。先是，耿精忠遣使于鄭經議和，以楓亭為界。尋經部將劉國軒與何祐及劉進忠兵數千人，狗屬邑之未下者。平南王尚可喜兵十餘萬盡銳來攻，相持久。國軒食盡，議退守潮。可喜麾鼓騎晨掩祐軍，戰于鶯母山下。祐以身先旗，直貫驍騎，出其左右。國軒繼之大敗，可喜軍追奔四十餘里，斬首二萬，捕虜七千。麟籍死者徧滿山谷。國軒威名震于南粵。經遂帥諸將圍漳州。黃芳度清海澄公黃梧子方經之至，島廈門島也海澄公所居陽為受。

續通志卷之五

命陰固備禦。經覺急圍之。芳度盡力防戰。至是城陷。芳度投井而死。○十一月。叛賊馬雄等犯高州。雷廉潮等州俱失守。○十二月。海寇復犯温州。水師提督常進功總兵朱萬化自定海關出洋。勦禦連破賊衆于沈家門等處。○丙辰十五年正月。定遠大將軍圖海往莅西師。貝子洞鄂以下咸受節制。吳三桂方遣王屏藩譚洪吳之茂三路分犯秦隴。欲與平涼賊合。并令雲南土司總兵陸道清率苗猓千人入平涼助守。圖海至。督諸將一戰大敗賊于平涼城北。奪其虎山墩。斷賊餉道。俯瞰城中。以礮攻之。王輔臣懼。遂率偽巡撫總兵等降。王屏藩吳之茂屢為張勇王進寶

王輔臣降

所敗。遁還漢中。固原慶陽諸軍皆復。○四月。廣東提督嚴自明總兵苗之秀副將王啓秀叛。尚之信陰通賊首。迫其父可喜為亂。受吳三桂招討。大將軍偽號。易幟改服。以兵守可喜府。禁出入。移檄郡縣。當是時。惠州有尚之孝之軍。高州有金光祖舒恕之軍。肇慶有恭依圖之軍。精銳不過二三萬。足以合力制之。信拒楚賊。而總督金光祖陰受三桂賄。即引所部兵還肇慶。阻恕及恭依圖兩軍。勿勦賊。并趣其引退。於是藩屬總兵孫楷宗水師副將趙天元等皆叛。尚之孝勢孤。不得不解兵柄。還廣州。之信遂大猖獗。以礮擊舒恕於廣州。舒恕走贛。菴衣圖亦自肇慶走還。光祖

續通志卷之五十一
及巡撫佟養鉅并陞於三桂於是尚可喜發憤死三桂封
之信輔德親王趣其出師索其助餉又遣偽總督董重民
代金光祖偽巡撫馮甦代佟養鉅分守衝要光祖之信皆
復悔密通款於江西大軍○九月命穆占佩征南將軍印
統陝西河南諸軍赴湖江討吳三桂○十月康親王帥師
抵延平偽將軍耿繼美以城降耿精忠大懼遣使赴延平
獻偽印并遣其子耿顯祚來迎王師至福州精忠率偽官
出城降命還精忠爵如故仍率所部兵征海寇自効偽將
馬成龍以興化款于鄭經初精忠思與鄭氏合力已而不
協官兵擊其外經擊其內前後跋扈卒至于敗
跋扈詩狼

胡載憂其尾注跋扈也胡領下懸肉也囊竹利切哈也老狼有胡進而蠟其胡則退而哈其尾○十一月
海寇鄭經遣其將許耀以兵二萬逼福州連營烏龍江康
親王遣都統喇哈達等渡江擊克賊營追奔四十里進兵
復興泉汀漳四郡○安親王岳樂趨長沙簡親王喇布移
軍江西吳三桂以兵七萬據岳州澧州諸水口以拒荊州
江北之師以兵七萬據長沙萍鄉醴陵以拒江西之師安
親王由袁州進攻萍鄉守將夏國相棄城走遂進攻長沙
湖南震動三桂既不得志于秦聞長沙急自將援長沙屯
嶽麓山使胡國柱守城中馬寶王緒營城外掘重濠布鐵
蒺藜列象陣盡調夷陵南漳諸賊合力拒守荊岳官兵渡

江急進勒爾錦敗賊于公安之虎渡口察尼敗賊于澧州之太平街尚善遣舟師入洞庭湖克君山獲賊舟五十艘時賊下流兵潰走官兵長驅可以夾攻長沙而諸軍遷延不進賊舟救至勒爾錦即弄太平街引還荊州尚善舟師亦未能斷賊餉道江湖之險復為賊據三桂復使賊將高木節等陷吉安以斷安親王軍後路高大節驍果善戰以少擊衆我師輒挫嘗以百騎奔我軍于大覺寺輒斬將寨旗又以少兵奔我大軍于螺子山簡親王將軍希爾根皆倉卒奔營走賊入壘縱飲飽掠而歸會賊將韓大任搆之胡國柱木節怏怏死大任不敢出戰吉安遂為我師所圍

高大節善戰

○丁巳十六年正月吉安糧且盡吳三桂遣馬寶王緒以兵來援大任疑不之信寶師至城中寂然無一礮相應亦疑不敢進乃引還湖南官兵二萬追擊為賊連敗○二月官兵敗鄭經于新泉縣賊奔漳州遁遂復海澄等十縣福建平○三月劉進忠苗之秀請康親王軍前乞降詔赦其罪並以原官從大兵征討尋授進忠討逆將軍○四月賊將韓大任弄吉安遁皆步行渡河我師聞其鼓礮以為劫營尚驚擾達且不敢追擊大任復合土寇踞寧都樂安間○吳三桂率衆赴衡州簡親王分兵禦之恭依圖師至南安嚴自明以城降遂克南雄抵韶州傅公烈迎降○五月

尚之信降

尚之信以廣東降。○七月。鄭經將劉國軒自惠州犯東莞。將趨廣州。尚之信大敗之。賊將陳璉以惠州降。○八月。朱統錫犯江西。陷貴溪。盧溪諸縣。○命和碩額駙率善等率師濟簡親王軍。○吳三桂將胡國柱馬寶冠韶州。恭依圖額。夔夾擊破之。賊敗走帽峯山。官兵攻之。賊走樂昌。○福建按察使吳興祚敗朱統錫于光澤。執之。○十一月。賊韓大任踞萬安縣之梁口。以應吳三桂。○十二月。海寇犯泉州及欽州。官兵擊敗之。○戊午。十七年。正月。安親王復瀾陽平江。又招降偽水師將軍林興珠。將軍穆占。以陝西荆州精兵至。拔永興。茶陵等十二城。○三月。吳三桂已失陝

吳三桂即
皇帝位

西閩粵三大援。又失江西。大兵雲集湘湖間。疆宇日蹙。財用耗竭。恐四方見輕。情竭勢絀。乃思竊帝號。自娛其下。亦爭勸進。以衡州當兵衝。自長沙徙都之。築壇南嶽。祀天。即皇帝位。改元昭武。改衡州為定天府。置百官。封諸將。造新曆。舉雲貴川湖鄉試。號召遠近。○四月。副都統穆赫林提督黃芳世與蔡寅戰于灣腰樹。失利。賊陷平和。遂進逼潮州。○叛將祖澤清結連山海諸寇。犯電白。尚之信帥師大破之。澤清奔城遁。○五月。鄭經授劉國軒中提督。率舟師入鎮門。壁碧湖。戰于赤嶺。總督郎廷相等按兵漳上。泉福潮三州兵。後先來援。國軒數戰皆敗之。遂取平和漳平圍

海澄命姚啓聖趣諸軍往援次葛布山隔帶水相望而已
 海澄食盡城破提督段應舉自經其餘死者甚衆國軒軍
 威益熾遂取長泰同安○厄魯特濟農為噶爾丹所敗闌
 入內地詔張勇逐出邊○吳三桂率諸將力攻郴州統領
 碩岱與戰失利退保永興三桂進兵攻永興將軍穆占赴
 援永興衡州門戶相距僅百餘里賊所必爭我都統伊里
 布副都統哈克山相繼戰沒河外營壘為賊據統領碩岱
 等入城死守賊三面環攻晝夜不息簡親王屯茶陵不敢
 救穆占來援亦不敢進城壞于礮囊土補之且築且戰凡
 二十日瀕危者數矣賊忽拔營去是時吳三桂死諸賊皆召赴衡州○八

吳三桂死

月安遠靖寇木將軍尚善薨于軍命多羅貝勒察尼代之
 ○吳三桂死年六十七諸逆秘不發喪初三桂舉兵諸將
 或言疾行渡江全師北向或言直下金陵扼長淮絕南北
 運道或言宜出巴蜀據關中塞散函自固三桂年老更事
 多欲出萬全不肯弃滇黔根本初得湖南即下令諸將毋
 得過江以為事縱不成可畫長江而國故用兵數載未嘗
 長驅東北及木兵四合境蹙身死諸賊聚謀不知所出夏
 國貴復倡弄滇之議謂為今日計有進死無退生宜舍湖
 南不顧北向以爭天下諸賊俱重弄滇馬寶首梗議知是
 時南北俱已戒嚴大兵鼓行隨其前後縱冒死衝突無能

為也。○甘肅提督張勇疏言臣等密探噶爾丹情形噶爾丹居西北金山距嘉峪關兩月程即古大宛國也今歲二月內自其地起兵不知何向臣復遣人至墨爾根台吉所審視之眾皆安居寂然○九月海寇劉國軒圍泉州官兵分路赴援國軒帥二十一鎮兵戰于龍虎山大敗亡師五千國軒尾所乘馬泅河以遁○十月上巡視北邊○賊將馬寶胡國柱等迎三桂之孫吳世璠於雲南至始發喪僭號改元洪化迎喪還滇○已未十八年正月賊將陷德興進逼樂平貝勒察尼等圍岳州復之賊恃湖為險取糧于湘陰常德我舟師僅營于君山賊舟來往自如至是水師

吳世璠僭號

烏船百艘沙船四百餘艘皆造成用降將林興珠策以其半泊君山截常德之道其半泊扁山香爐峽布袋口諸處并泂九貴山立陸營以斷長沙衡州之道冬令水涸則決新堤灌水通舟水陸綿亘百里賊援兵不敢進吳應麒使其黨駕巨艦二百乘風犯柳林我水師掉輕舟飛越賊船礮毀其半又敗其眾五十于陸石口餉運不繼我軍又縱反間離其黨吳應麒以疑殺數將于是偽總兵三人以舟師降城中賊潰圍走常德岳州既復諸賊震恐夷陵澧州之賊以舟師降常德長沙賊將皆奔城焚掠遁我師悉復其城○二月簡親王遣前鋒統領希福等取衡州賊將胡

國柱夏國相道穆占追敗國貴于永州湖南上流惟辰州之辰龍關與武岡之楓木嶺為入黔要路皆天險吳國貴馬寶路武岡胡國柱等踞辰州安親王至武岡攻賊於楓木嶺巡撫傅宏烈由後路斷其餉道而大軍奮擊其前破殪吳國貴賊潰遁遣彰泰追敗之遂復武岡貝勒察尼攻辰龍關徑狹菁密僅容一騎賊跨隘口立五營以拒○五月詔內閣學士徐元文翰林院學士葉方霽右庶子張玉書等修明史○七月京師地震詔部院三品以上官及科道在外督撫等官言政治得失發內帑金十萬兩賑軍民廬舍傾圮及死傷者○將軍傅宏烈復柳城融縣挂柳路

修明史

新編明史卷之五

十七

通馬雄子承蔭來歸詔授伯爵佩將軍印從征○九月金光祖執祖澤清械送京師○十一月王進寶入雞頭關遂復漢中府○十二月前鋒統領佛尼勒吳丹克梁河關偽將軍韓晉卿遁入四川遂復興安州平利紫陽石泉及湖廣竹山上津諸縣以次底定○庚申十九年正月提督趙良棟王進寶攻保寧敗賊二萬于城外奪橋而進賊將王屍藩自縊死生擒吳之茂等來勝復順慶而趙良棟由畧陽進克陽平關渡白水江復龍安○祖澤清及子祖良棟皆伏誅○將軍佛尼勒總兵王朝海率兵取順慶偽知府彭天壽等降○福建水師營提督萬正色分兵為六隊逼

續編明史卷之五

十七

海壇統巨艦繼之。又以輕舟繞出左右，並力攻以巨炮，擊破賊船，溺死三十餘。賊悉潰，偽將朱天貴遁。據南日、湄州等澳。○二月，萬正色迫擊至平海澳，與吳興祚師會。朱天貴糾偽將軍林陞、據崇武澳。正色乘風自平海南下，賊迎拒掩擊之，破斬偽總兵吳內、偽副將林勳。湄州南日、平海崇武諸澳悉下。天貴降。副都統沃申擊賊將張志于大定、小定，連敗之。我兵水陸並進，趨王洲。劉國軒走廈門，偽總兵蘇堪以海澄降。姚啓聖亦分遣總兵趙得壽、黃大來等隨賴塔擊陳洲、馬州、灣腰山、觀音山、展旂諸寨。吳興祚同喇哈達等由同安追擊至浚尾，遂克廈門、金門，餘寇遁還。

賜尚之信
死

臺灣。○馬承蔭復叛于郴州，襲傅宏烈軍，命都統夸扎帥師與平南王等協勦。平南將軍賴塔等守潮州，以備馬承蔭。○五月，簡親王金光祖莽依圖合師討馬承蔭，自雒容進取柳州。承蔭復降。○七月，賜尚之信死，初吳三桂之反，之信迫其父可喜從賊，可喜卧疾，弗能制，憤甚，自縊死之。信遂降賊，及歸正，仍懷兩端，甚至希邀異數，毀訛乘輿於藩下人。張永祚等來京，告其不法事。之信母舒氏、胡氏都統王國統亦相繼疏列其罪，上遣刑部侍郎宣昌阿執之。之信之信旋具疏辨，上不忍遽置法，命來京對簿。會其弟之節等陰糾黨羽，誘殺王國棟，欲為亂。於是賜之信死之。

系一八

七

鄭經死

吳世璠奔雲南

節等皆伏誅。○九月。譚宏復叛。陷瀘叙永寧。黎民亦應之。將軍噶爾漢都統范達禮提督徐治都等率師赴夔州。與貝子準塔分道攻之。譚宏彭時亨陷涪州。○十月。貝子章泰等自平越趨貴陽。吳世璠劉國炳吳應騏奔雲南。降其文武偽官二百餘。傅宏烈陷賊。不屈死之。○十二月。提督桑峩等大敗吳世璠于永寧州。復其城。賊焚鐵索橋。遁。乃令土司龍氏沙氏結浮橋以濟師。偽將軍饒一龍等以慶遠降。○辛酉。二十年正月。前貴州提督李本深及文武官降。械李本深送之京師。○叛將譚宏死。將軍噶爾漢進擊復其城。譚宏子天秘遁。○海賊鄭經死。經嗣位十九年。奉故明永曆正朔。佩

招討大將軍印稱世子無所受命也

長子克壘原姓李。經嬖妾林氏養之。經

無知也。及經西克壘為監國。克壘嚴毅頗倣成功。諸弟畏之。迨經敗東還。以國付克壘。至是經死。諸弟揚言曰。克壘非吾骨肉。一旦得志。吾屬無遺類。經母董氏命收監國印。幽殺克壘于別室。立次子克塽。襲為延平王。○賊將夏國相等擁兵二萬屯平遠。又分兵萬餘據盤江西坡。坡天險斜徑螺旋而上。賊以象迎戰。我軍迫險。見象即驚潰。蔡毓榮以紅旗督戰。衆奔不能止。死傷山積。逾二日。毓榮整隊復進。賊不能支。棄險西走。貴州盡復。○二月。太將軍貝子賴塔等進軍抵雲南。吳世璠使郭壯圖率步騎數萬列象

陣迎戰城外我貝子彰泰軍其左賴塔軍其右自卯至午
賊五却五進殊死戰象忽反踐其軍我勁騎左右衝之始
大却進逼之城東歸化寺自歸化寺列營且碧雞關為長
圍數十里賊分門守禦誓必死○三月慶陽賊耿飛稱王
設偽官職詔圖海張勇孫思克等遣兵討之○吳世璠受
圍益急密召蜀中賊將馬寶胡國柱夏國相等歸援趙良
棟率諸將分路躡擊賊眾或死或潰降無一援兵得至滇
城者世璠復割地乞師于西藏達賴喇嘛其書亦為我軍
所得○四月海賊楊二犯瓊州總兵蔡章督舟師擊敗之
焚賊船百餘艘賊遁○五月慶陽賊耿飛降○上嘉尚可

吳世璠自
投

喜始終無二賜白金八十兩葬海城立碑墓道詔以可喜
昔年海城田宅賜其第七子之隆設佐領二以其一為可
喜守墓授之隆領侍衛內大臣○楚雄府偽將軍陳光祿
等復叛○七月偽將軍馬寶巴養元等降命俱械送京師
伏誅○十月太兵復滇城吳世璠自殺先是趙良棟自
蜀至連破賊壘直薄其城諸軍從之皆薄城下圍之數重
又于昆明池內橫筏施樓櫓以斷接濟城中食盡援絕守
南門賊內應啓門納師世璠及郭壯圖皆自殺俘偽大學
士方光琛偽將軍夏國相等函世璠首獻闕下析三桂骸
骨頒示海內雲貴川湖地悉平○壬戌二十一年正月十

昇平喜宴詩

四日上御乾清宮。宴內閣大學士翰林學士等官九十三員。特勅群臣。懽怍暢飲。笑語無禁。宴畢復命。近御座前觀燈。更賜卮酒。霑醉者。令內官扶掖而行。明日御製昇平喜宴詩序。及首唱麗日和風被萬方。句。群臣集太和殿。做拍梁體。以次各呈詩九十二韻。○琛從逆貴州提督李本深于市。子象乾象坤。孫濟祥濟民。並斬。○楚人朱方。自自號二眉道人。陽托修煉之名。陰挾欺世之術。廣招黨羽。私刻秘書。其書有曰。古號為聖賢者。安知中道。中道在我。山根之上。兩眉之間。其徒互相標榜。有顧齊宏者。曰。古之尼山。今之眉山也。陸光旭則曰。孔子後二千二百餘年。而有吾

師眉山夫子。朱程精理而不精數。太儒之用小。老莊言道而不言功。神仙之術虛等語。皆刊書流布。蠱惑庸愚。侮慢先聖。評罔悖逆。部議乞斬從之。○上以雲南底定。躬詣盛京。○五月上回京。御書清慎勤三字。頒發各督撫。○六月。諭部院諸臣。朕因天氣炎熱。移駐瀛臺。今幸天下少安。四方無事。然每日侵晨。御門聽政。未嘗輒輟。卿等各勤職掌。時來啓奏。曾記宋史所載。賜諸臣於後苑賞花釣魚。傳為美談。今於橋畔。懸設置網。以待卿等遊釣。可於奏事之暇。各就水次。舉網得魚。隨其大小。多寡。攜歸邸舍。以見朕一體燕適之意。○九月。施琅請簡水師二萬。戰艦三百。獨

施琅討臺
灣

任討臺又言不破澎湖臺灣斷無取理臣請先取澎湖督
 臣留廈門濟餉允之○十月貝子章泰都統賴塔自雲南
 凱旋上郊勞越盧溝橋駐蹕行抱見禮○癸亥二十二年
 六月先是劉國軒貽書總督姚啓聖請如琉球諸國例稱
 臣入貢啓聖以聞上不許趨琅進兵時國軒擁眾二萬餘
 據守澎湖甚堅至是施琅軍發銅山入八章嶼乘南潮攻
 澎湖斬偽將軍沈誠等七十餘人復以太鳥船五十六分
 八隊奮擊沉其船二百斬偽官三百餘兵萬餘國軒乘小
 舟由吼門竄去餘眾悉降○八月鄭克塽投誠施琅至鹿
 耳門膠淺不得入泊海中十有二日潮不至忽大霧潮高

鄭克塽降
臺灣平

丈餘舟浮而入鄭氏皆賊曰先王得臺灣鹿耳門張今復
 然天也鄭克塽及偽武平侯劉國軒偽忠臣伯馮錫範及
 偽文武官俱薙髮收偽延平王金印一招討大將軍金印
 一公侯伯將軍銀印五授克塽公爵隸漢軍成功子鄭聰
 等六人克塽弟克舉等九人偽武平侯劉國軒等子弟俱
 移入內地尋加施琅靖海將軍封靖海侯世襲罔替○十
 月上問理學之名始於宋否張主書奏道理具在人心宋
 儒講辨加詳耳上曰日用常行無非此理自有理學名目
 彼此辨論朕見言行不符者正多矣終日講理學而所行
 全與其言背豈得謂之理學乎若口雖不講而行事自然

論理學

聰合此即真理學也。○勒輔疏報蕭家渡工成河歸故道。又請增開封歸德堤工以防上流壅滯上諭河道關係國計民生最為緊要今聞河流得歸故道深為可喜以後益宜嚴密勿致疎防。○甲子二十三年正月施琅奏臺灣地數十里民數十萬棄之必為外國所據請設鎮守官設台灣一府二縣巡道一員總兵官一員副將二員兵八千設澎湖副將一員兵二千。○十月上幸濟南府至泰安州登泰山極頂書普照乾坤四字建亭遂幸蘇州府幸江寧府回鑾經泗水幸曲阜詣先師廟行三跪九叩頭禮。○上諭凡所貴道學者必在身體力行見諸實事非徒託之空言朕聞學士湯斌曾與中州孫鍾元講明

道學頗有實行前典試浙江操守甚善可補授江寧巡撫。○乙丑二十四年三月副都統史張可請駕幸闕里御書萬世師表匾額勒石頒給各省府州縣學懸掛從之。○上巡幸塞外是日出古北口侍郎明愛遣人馳報稱都統公彭春等帥師抵雅克薩城下遵諭旨宣示羅刹不肯遷歸於是分水陸兵為兩路並進急攻羅刹城守城頭目額里克舍等乞降立視遷歸收回逃人復雅克薩城。○七月上諭內閣諸臣自古皆新舊兼行以從民便若設例禁恐滋煩擾因考自漢至明故事為議以獻。○丙寅二十五年二月郎中滿丕等奏額禮克謝率五百餘人復至雅克薩依

舊址築城居之上以不速撲滅勢必積糧堅守圖之不易
令將軍薩布素等姑停遷移家口如前所請速修船艦統
領烏喇寧古塔官兵馳赴黑龍江城至是帥所部兵二千
攻雅克薩城○江寧巡撫湯斌疏言吳中風俗尚氣節重
文章而佻巧者每作淫詞艷曲壞人心術蚩愚之民斂財
聚會迎神賽社一簠之值至數百金婦女有遊冶之習靚
粧艷服連袂寺院無賴少年習學拳勇輕生好鬪名為打
降臣嚴加訓飭委曲告誡一年以來寺院無婦女之遊迎
神罷會艷曲絕篇打降斂迹惟妖邪巫覡習為怪誕之說
愚民為其所惑牢不可破蘇州府城西上方山有五通淫

湯斌治吳中

祠幾數百年遠近之人奔走如鶩牲牢酒醴之享歌舞笙
簧之聲無間歇諺謂其山曰肉山其下石湖曰酒海凡少
年婦女有寒熱症者巫覡輒曰五通將娶為婦病者神魂
失據往往羸瘵而死每歲常至數十家臣多方禁之其風
稍息比因臣至淮乘隙益肆猖獗臣遂收妖像木偶付之
烈炬土偶投之深淵檄行有司類此者盡撤毀之其材備
修學宮葺城垣之用民始而駭以為從前曾有官長銳意
革除旋即遇祟而死皆為臣危之數月之後見無他異始
大悟往日之非然吳中巫覡最黠且悍恐臣去任後又造
怪誕之說算斂銀錢更議興復請賜特旨嚴禁勒石山巔

淫祠有關風化

庶可永絕根株。疏上得旨。淫祠惑眾。誣民有關風化。如所請。勒石嚴禁。直隸及各省有似此者。一體飭遵。先是。廷臣有言輔導皇太子之任。非湯斌不可者。至是。上諭吏部曰。自古帝王諭教太子。必簡和平謹恪之臣。統領官僚。專資贊導。江寧巡撫湯斌。在講筵時。素行謹慎。朕所稔知。及簡任巡撫以來。潔已率屬。實心任事。允宜拔擢。太用風示有位。遂陞任。湯斌為禮部尚書管詹事府事。○諭購求遺書。禮部等遵旨。議覆購求遺書。應令直隸及各省督撫出示曉諭。如得遺書。令各有司會同儒學教官轉詳督學。及該督撫酌定價值。彙送禮部。其無刻本者。亦令各有司雇募。

購求遺書

繕寫進呈。得旨。朕披閱載籍。研究義理。凡厥指歸。務期于正。諸子百家。及濫竽詭有。乖經術。今搜訪藏書。善本惟以經學史乘。實有關係修齊治平。助成德化者。方為有用。其他異端裨說。概不准錄。○七月。鄂羅斯察漢汗上疏乞撤雅克薩之圍。上諭察漢汗。禮通好。朕本無屠城之意。其令薩布素等。撤兵。收集于所近。戰艦立營。並曉諭城內。羅刹聽其出入。毋得妄行攘奪。俟鄂羅斯使復至。定議。○丁卯。二十六年十一月。免江蘇浙江二省。明年地丁各頂錢糧。及本年未完錢糧。○戊辰。二十七年六月。楚省督標裁兵。夏包子。夏逢龍等。聚眾作亂。巡撫柯永昇投井死。按察

夏逢龍作亂

葉映榴遺疏

使丁煒棄家奔安慶時糧儲道葉映榴兼署布政使賊迫授偽職映榴約以無殺掠百姓三日後當如所言乃令其妻奉母自水溝出避難以司道等印五付其僕葉華林向所過衙門呈繳遂繕遺疏朝服望闕謝恩訖升公座罵賊拔佩刀自刎疏畧曰茲值裁兵夏逢龍倡亂奴奪撫臣勅印並分兵圍臣衙門露及逼脅臣幼讀詩書粗知節義雖斧鑕在前豈肯喪恥偷生伊時即欲率同妻女閤門殉節第念臣母年七十有六在臣任所因遣妻女奉母潛逃臣如微服匿影或可倖免以圖後效伏念臣守土之官也城存與存城亡與亡義所當然今勉盡一死以報國恩所恨

葉映榴死節

事起倉卒既不能先事綢繆默消反側復不能臨期捍禦獨守孤城上辜三十載之皇恩下棄七旬餘之老母君親兩負死有餘慙上覽疏畢諭曰凡地方官城存與存城亡與亡人臣之分葉映榴守義不屈詈賊自刎閱其遺奏五內傷悼王大臣等其共聽之因令展讀奏疏聞者莫不感泣詔贈工部右侍郎賜祭葬如典禮謚忠節建祠御書丹心炳冊額賊據武昌城命都統瓦岱為振武將軍率兵討之○尚書阿喇報噶爾丹率兵掠厄爾特泥沿居民直抵喀喇卓爾之北距澤卜尊丹巴所居僅一日程澤卜尊丹巴攜土謝圖汗妻子及喇嘛班第等夜遁命邊塞加意防

守○七月澤卜尊丹巴胡土克圖遣使告急噶爾丹自抗
愛山後至忒木爾地方土謝圖汗子噶爾且台吉與戰大
敗又聞丹津温卜等率兵來取厄爾特泥浴之地距我地
二日程祈速賜救援○夏包子率賊萬餘圍應城我師內
外夾擊大敗之賊奔德安○侍讀海三往澤卜尊丹巴處
携噶爾丹奏疏歸上遣使議和○諭格親王全福等師兵
備禦厄魯特厄魯特在伊黎西北○總兵史孔華進討夏逆于漢陽
城大敗之賊遁武昌參將鄭興等擊破夏包子擒偽總兵
以下二十餘員賊眾獻武昌黃州等城投降黃岡縣生員
宜畏生等擒賊首夏包子獻命磔之○八月土謝圖汗與

噶爾丹相遇于鄂維會諾爾慶戰二日厄魯特夜襲善巴

額爾克戴青之營破之喀爾喀諸台吉星散土謝圖汗越

瀚海奔至澤卜尊丹巴所○九月喀爾喀載青台吉土謝

喀爾喀諸台吉內附

圖汗澤卜尊丹巴胡土克圖及阿霸哈納諸台吉等皆願
內附許之准于汎界以內游牧○噶爾丹遣使進貢請安

○己巳二十八年正月上南巡閱河二月至杭州渡錢塘

祭禹陵

江親撰祭文詣禹陵致祭行三跪九叩頭禮至江寧江南

民王來熊獻鍊金養身秘書一冊上曰此等事朕素不信

其擲還之三月御舟至天津由陸還宮○九月以早免直

隸被災州縣衛所本年未征及明年上半年錢糧諭直隸

巡撫于成龍直隸地方。朕屢豁免錢糧。百姓竟無起色。今年荒旱。比往年更甚。朕在深宮。俯念民生困苦。衣食地方大小各官。遇此荒年。束手無策。于民何益。爾等受國厚恩。為民父母。寧獨不愧于心。當思良法。使貧民不填溝壑。以副朕軫念閭閻至意。○十一月。理藩院題。烏斯尼哈白塔侍持喇嘛等。稱伊師喇木占巴喇嘛。復轉生于世。祇請往聚。上曰。蒙古之性。深信詭言。但聞喇嘛胡土克圖。胡必爾汗。不計真偽。便極誠叩頭。送牲畜等物。以為可獲福長生。至蕩家產。不顧而奸究之徒。得以行詐。漫謂能知前生之事。惑眾欺人。網取財帛。牲畜。敗壞佛教。諸蒙古篤信喇嘛。

定鄂羅斯
邊界

久已惑溺。家家供養。應將此等詐稱胡土克圖者。嚴行禁止。○十二月。定鄂羅斯邊界于格爾必齊阿勒滿漢及鄂羅斯喇第納蒙古字于上。○庚午。二十九年。四月。大清會典成。○六月。尚書阿喇報。我師與厄魯特戰于烏爾會河。失利。○七月。噶爾丹深入烏朱穆秦地。命裕親王全福為撫遠大將軍。皇子允禔副之。出古北口。命康親王傑書為安北大將。簡親王雅布。信郡王鄂禮副之。出喜峯口。上巡兵至博洛河屯回鑾。○八月。厄魯特噶爾丹之本國屯于烏闌布通。我兵徐進。自未時交戰。至掌燈時。大敗之。次日進剿。殺餘寇。噶爾丹據險堅拒。遣使復請。以土謝圖汗澤卜尊丹。

巴界之上命速進剿命都統希福馳赴裕親王軍參贊軍務噶爾丹使人持書至告曰噶爾丹跪于威靈佛前曰若違此書佛鑒之上命許降約噶爾丹自來會盟以噶爾丹雖降人殊狡猾乃派木兵備之○辛未三十年正月噶爾丹劫涼墨爾根爾額爾克向青海而去命陝西官兵至寧夏備之青海青海古西海郡在西寧府西三百餘里其水周七百餘里郡山繞之猶不流中有二島不通舟楫惟水合可通即弱水也蒙古謂曰庫克淖爾環海居者皆番族其地西回疆南衛藏北王關表延二十餘里漢時鮮水諸卷也唐以前為吐谷渾唐未并入吐番○二月策妄阿拉布坦及阿奴等遣使奏與噶爾丹交惡始末厚賜遣之○四月上親巡邊外○五月上回宮○閏七月川陝副將陳祚昌等進勦昌

寧湖大敗博際殺蒙古兵五百餘博際遁去○免直隸河南山西陝西湖廣雲南被災一百五十八州縣額賦湖廣江西浙江江蘇安徽山東應輸漕糧自康熙三十一年始以次各蠲一年○壬申三十一年命各州縣積貯米穀○以靳輔為河道總督修河○三月巴圖爾額爾克濟農率其子雲木春台吉來降○癸酉三十二年十月鄂羅斯察漢汗遣使進貢上曰鄂羅斯人材頗健從古未通中國距京師甚遠自嘉峪關行十一二日至哈密自哈密行十二三日至吐魯番吐魯番有五種部落過吐魯番即鄂羅斯之境聞其國有二萬餘里漢張騫出使西域或即彼處外

新子金錄卷之五

三十一

藩朝貢雖屬盛事恐傳至後事未必不因此反生事端總之中國安寧則外釁不作故當以培養元氣為根本要務耳。○乙亥三十四年二月厄魯特噶爾丹遣使入貢請回故土澤卜尊丹巴及土謝圖汗二人上賜勅責其不悛噶爾丹率騎三萬入寇。公克魯倫河而下。內其水流入黑龍江侵掠至巴顏烏闌自秋徂冬不去聲言借俄羅斯烏鎗兵六萬將大舉內犯以前敗由火器不如中國故倂為此言以張其軍也。○丙子三十五年二月上親征噶爾丹皇太子留守京師命將軍薩布素率東三省兵出東路遏其衝太將軍費揚古振武將軍孫思克等率陝甘兵

厄魯特入寇

親征噶爾丹

出寧夏西路邀其歸上親統禁旅由獨石口出中路皆赴瀚海而北約期來攻沙磧不宜車乃留木礮惟駝子母礮以行每駐營上親拊士卒相水草軍行瀚海泉溢芻生五月遂由科圖進徧賊境而東路軍尚未至西路軍亦奏言賊盡焚草地我軍迂道秣馬糧運阻雨師七十餘日士馬餒困乞上緩軍以待途次復有傳鄂羅斯助兵之信太學士伊桑阿等力請回鑾上怒曰朕祭告天地宗廟出征不見賊而返何以對天下且木軍退則賊盡銳注西路西路軍不其殆乎遂率兵疾趨克魯倫河上定計遣使噶爾丹告以駕至噶爾丹登北孟納蘭山望見御營黃幢龍毒環

讀十八史畧讀本卷之五

三十一

卷之五

三十一

拒馬木

以慢城又外為網城軍容山立大驚拔營宵遁翌日大軍
 至河則北岸已無一帳。克魯倫河者起車臣汗西界東北
 近黑龍江橫亘瀚海東北二千里
 乃內外蒙古之界也。上初意賊必扼河拒戰。上親率前鋒
 故兩路出師攻其腹背。及是知賊已喪膽。上親率前鋒
 兵窮追噶爾丹倉皇遁走。沿途遺棄老弱器物無算。我西
 路兵邀之于昭莫多。昭莫多蒙古語大樹林也。此即明成
 祖破阿魯台地在肯特嶺之南。上臘
 河之北。汗山之東。平曠饒水草。回望
 大嶺。千仞如屏。為自古漠北戰場。費揚古等遵上所授
 方畧。各兵皆下馬步戰。約聞角聲始上馬。孫思克以兵據
 山頂。臨之賊爭山頂。鋒甚銳。我兵據險俯擊。弩銃迭發。藤
 牌繼之。每進輒以拒馬木列前自固。藤牌防矢銃之器。拒
 馬木列于前所以制
 敵騎之衝突。即衛青
 武剛車自環之意。賊冒矢銃鏖鬪。至暮不退。人人如怒

虎林木皆震。費揚古遙望賊陣。後人馬不動。必其婦女駝
 畜也。乃麾沿河伏騎橫衝入陣。襲其後輜重。山上軍奮呼
 夾擊。賊始潰敗。乘夜追北三十餘里。天明收軍。斬數千級。
 降三十獲馬駝牛羊。廬帳器械無算。并殪其可敦阿奴。可
 準部稱其汗之
 妃。猶漢言皇后。傾軋敢戰。披銅甲佩弓矢。騎異獸似駝。非
 駝。精銳悉隸麾下。至是亦斃于礮。噶爾丹以數十騎遁。捷
 奏至御營。命費揚古留防。科圖護喀爾喀游牧地。上親撰
 銘勒察罕。拖諾山及昭莫多之山而還。○上次歸化城躬
 犒勞西路凱旋之師。獻厄魯特之俘。彈箏笳歌者畢集。有
 老胡工笳口辯有膽氣。兼能漢語。上賜之潼酒。使奏技音

厄魯特人歌

讀十八史畧讀本卷之五

三十一

調悲壯歌曰雪花如血撲戰袍奪取黃河為馬槽滅我名
王兮虜我使歌我欲走兮無駱駝嗚乎黃河以北奈若何
嗚乎北斗以南奈若何遂伏地謝上大笑手書以告皇太
子六月駕至京師○七月命內閣翰林院等官修平定朔
漠方略○九月上巡行北塞經理軍務初噶爾丹連年與
中國戰精銳喪亡牲畜皆盡回部青海哈薩克皆叛去至
是欲西歸伊犁則畏策妄那布坦之逼欲南投烏斯藏道
遠不能至欲北赴鄂羅斯而鄂羅斯拒不受聞翁金河翁金河與雅河拜達里克河皆相近在杭愛山之西阿爾泰山之東有我師餘糧乃遣兵掠之
又為我護糧兵所敗欲掠喀爾喀之游牧者有備其遺藏

使又為我青海都統所擒從者僅千人皆老羸自相盜上
乘其窮蹙欲降之駕再幸歸化城噶爾丹遣使探中國意
詔數其犯界之罪又許以恩例招撫之授以書噶爾丹歎
息曰天下人果不相同中國皇帝神靈竒異聞其行所至
泉湧于沙草生于磧冰泮于河是天助彼也今我所屬之
人已皆往屬之是人助彼也爾往其所觀其侍從大臣行
止若何歸日議之因泣下使者至瞻覲感服密輸情於我
大臣上聞而憐之命理藩院自獨石口至寧夏驛以待車
駕旋京師噶爾丹倔强卒不至○丁丑三十六年二月駕
發歸化城渡黃河幸寧夏命馬思哈費揚古兩路進兵噶

噶爾丹死

爾丹使子塞卜騰巴珠徵糧哈密為回人所禽。左右諸台吉聞大兵將至望風款附密鄉導大兵深入。又策妄那布坦擁勁兵伏阿爾泰山將禽以獻功。噶爾丹進退無地不知所為計。每夕或數驚。所至頻逢怪異。烈風淫雨隨之。自知人畔天亡。旦夕必就俘仰藥死。時上自寧夏循賀蘭山出邊。費揚古以噶爾丹口及子女來獻。於是自阿爾泰山以東皆隸服。○四月上勒銘狼居胥之山而還。至京師。○七月上巡幸塞外。○九月降人厄魯特台吉丹濟拉至。授散秩木臣。安插張家口。上還宮。○戊寅三十七年正月。朝鮮告飢。請開市。命吏部侍郎陶岱運米三萬石往朝鮮。以

瓊州生黎擾

萬石資之。○萬石平糶。○四月魯魁山賊首擦捏等劫掠村堡。努傷守備張廷柱。雲貴總督王繼文會同臨元總兵王洪仁遣土官兵勦撫。追斬賊首擦捏。餘衆奔潰。○己卯三十八年二月。上南巡。閱視河工。上奉皇太后至杭州府回鑾。上諭曰。今四海太平。最重者治河一事。○庚辰三十九年十二月。瓊州生黎出犯。寶停營。傷害兵丁。初瓊州文武官遣人往黎崗。採取花梨沉香。遂致黎人拒鬪。至是以總督石琳等平時毫無覺察。恣其貪毒。奏各自引罪。下部議。降級有差。生黎瓊州山間居住之蕃人也○辛巳四十年五月。上巡視西城。西山碧雲寺有前明太監魏忠賢墓。並碑二座。碑後

續通志卷之五

三十三

連州 搖起

刻有孝官孝孫等六七十人姓名。不填寫年號。御史張瑗以為狂悖不法。乞賜撲毀。上從之。○八月。上巡幸塞外。登索岳爾濟山。○九月。厄魯特策妄阿拉布拉解。噶爾丹女鍾齊海至京。上赦不誅。令婚配得所。致送○十二月。廣東官軍勦連州。搖人失利。○壬午。四十一年。二月。漢軍都統嵩祝偕副都統達爾占等。會總督石林調廣西湖南兵。進勦入排山寨。即于要地設立營壘。先遣人招撫。搖人懾服。皆行薙髮。荷負雞彘酒食。呈送行營。乞投誠。斬殺害官兵。李貴鄧一等九人。以狗。衆搖八千一百餘悉服。連州平。○鑄重錢。作銀一兩。鑄輕錢。作銀七錢。○癸未。四十二年。正

連州平

湖南苗作亂

月上巡視南河。登泰山。至杭州府回鑾。幸江寧府。○三月。上回宮。○八月。湖南鎮筵紅苗作亂。偏沅巡撫趙申喬同提督俞益謨等。檄粵黔楚三省提督會同進勦。貴州提督李芳遠奉詔移兵。會勦深入苗地。遣尚書席爾達副都統圖思海等。率荊州駐防兵會勦。十月。自龍椒洞至天星寨。分路搜勦。斬馘千餘。降其寨三百餘。移辰沅道駐鎮其地。○上西巡。幸太原府。至西安府回鑾。○十二月。自河南府還宮。○甲申。四十二年。兩廣總督郭世隆遣水師分巡外洋。上年十二月。至本年二月。前後擊敗賊衆于沱寧外洋。沉賊船七。斗頭角海面沉賊船十。瓊南萬崖海面沉賊船。

續通志卷之五

三十一日

續十八史畧

三十五

探視河源

二○給事中黃鼎揖湯右曾等合疏劾直隸巡撫李光地
 閱倉賑濟減價平糶事上諭大學士等曰李光地著留任
 其居官有何可議但彼專信門生常為所誑凡人口講道
 學彼即深信之夫道學豈易言哉孔子曰先行其言而後
 從之人之品行必始終不易朕始信之若徒託之空言而
 無實事則亦何益之有非特此也凡有職任者一有所為
 善惡立見更不宜輕言也○九月侍衛拉錫等探視河源
 回奏云登高山視星宿海之源小泉萬億不可勝數周圍
 群山蒙古名為庫爾滾即崑崙也自京師至星宿海共
 七千六百餘里至星宿海天氣漸
 低地勢漸高人氣閉塞故多喘息○上諭大學士等曰凡
 人皆當立品筮仕之初即思干請於人其立意如是則他

日又將何所望哉或有未任之先已債負盈積至入官
 後若不朘民何以償之國家名器豈為此輩償債設乎○
 乙酉四十四年二月上南巡閱河幸杭州江寧等府駐蹕
 城內考試舉貢生監詩字○四月上回宮○直隸巡撫李
 光地疏劾雲南布政司張霖假稱奉旨販賣私鹽得銀百
 六十餘萬兩上令光地審擬霖論斬家產籍沒入官以光
 地陞為文淵閣大學士○丙戌四十五年昆明人李天極
 謀不軌偽稱文興三年以鈐摹明桂王之寶及諸偽印散
 播大將軍都督僉事等偽官願入黨者改裝蓬頭僧或長
 髮道士潛期犯掠州縣雲貴總督貝和諾擒之立斬餘黨

續十八史畧

三十五

流徙○十月護軍統領席住等擒假達賴喇嘛及第巴妻
子時諸皇子及諸大臣俱言一假達賴喇嘛擒之何為上
諭曰衆蒙古俱傾心歸向達賴喇嘛此雖係假達賴喇嘛
而有達賴喇嘛之名衆蒙古皆服之倘不以朝命前往擒
獲之若為策妄阿拉布坦迎去則西域蒙古皆向策妄阿
拉布坦矣故特遣席住前去席住方到其地果有策妄阿
拉布坦令人來迎○戊子四十七年九月廢皇太子允禔
幽禁咸安宮○十一月直郡王允禔令蒙古喇嘛巴漢格
隆咒詛廢皇太子至是發覺上命革去允禔王爵幽禁於
其府內○己丑四十八年三月復立允禔為皇太子○辛

卯五十年上巡視通州河堤○三月閩督范時崇獲海賊
鄭盡心解京正法○五月上北巡駐蹕熱河行宮諭大學
士等曰天上度數俱與地之寬大脗合以周尺算之天上
一度即有地下二百五十里以今時尺算之天上一度即
有地下二百里古來繪輿圖者俱不依照天上度數以推
地里遠近故多差誤朕前特差能算善畫之人將東北一
帶山川地理俱照天上度數推算詳加圖繪視之○六月
泉州盜陳顯五等二千餘人搶掠永春德化漳平木田等
縣○壬辰五十一年十月皇太子允禔狂疾行事乖戾仍
行廢斥禁錮咸安宮○乙未五十四年四月厄魯特策妄

阿拉布坦兵至哈密北境侵掠五寨甘肅提督師懿德檄
 總兵路振聲率兵先赴哈密師懿德尋往救厄魯特兵薄
 哈密城下官兵同哈密白額敏擊敗之調右衛察哈爾歸
 化城黑龍江索倫打虎兒喀喇沁鄂爾多斯兵往推河地
 方駐劄令將軍費揚古帥領調遣既而厄魯特兵聞官兵
 至遁去○丁酉五十六年三月命靖逆將軍富寧安由巴
 爾庫爾一路命公傅爾丹為振武將軍祁里德為協理將
 軍由阿爾泰一路襲擊準噶爾準噶爾即厄魯特也○四月廣東總
 兵陳昂疏言天主一教設自西洋今各省立壇招集匪類
 居心匪測目下廣州城設立教堂內外布滿加以同類洋

征準噶爾

船叢集安知不交通生事乞飭早為禁絕從之○青海親
 王羅卜藏丹津報策妄阿拉布坦屬下策零敦多卜等領
 兵三千來西藏拉藏汗整兵交戰數次兩無勝負策零凍
 餒疲極遣官兵駐青海形勝之地○八月總督額倫特色
 楞俱統兵至喀喇烏蘇與厄魯特賊遇相持月餘額倫特
 没于陣○十二月命皇子允禔為撫遠大將軍帥兵進勦
 策妄阿拉布坦○已亥五十八年靖逆將軍富寧安至庫
 庫車爾修築城池駐兵傅爾丹于英代察罕搜爾與鄂爾
 齊圖果爾二處各築一城將充發者暫往耕種○庚子五
 十九年正月授都統宗室延信為平逆將軍護軍統領噶

征西藏

爾弼為定西將軍。往征西藏。蒙古汗王貝勒台吉各自率所部兵。隨大兵。扈從達賴喇嘛入藏。軍容甚盛。噶爾弼招撫巴塘裏塘番眾。進至察木多。奪洛隆宗三巴橋之險。旋奉大將軍檄。俟期並進。噶爾弼恐期久糧匱。用副將牟鍾琪以番攻番之計。即招土司為前驅。集皮松渡河直趨西藏。降番兵七千。分兵塞險。拒賊饒道。青海軍亦三敗其中途。劫營之賊。斬俘千計。厄魯特遂大潰。不敢歸藏。即由舊路北竄。崎嶇凍餒。得還伊犁者不及半。伊犁厄魯特之都城詔加封達賴喇嘛。于九月登座。取拉藏所立博克達喇嘛歸京師。盡誅厄魯特喇嘛之助逆者。留蒙古兵二千。以拉藏舊臣

臺灣朱一貴作亂

貝子康濟爾掌前藏。台吉頗羅鼐掌後藏。自第五世達賴卒後三十餘年。兩立假喇嘛。西陲俶擾。至是始定焉。倣擾竹切動也○辛丑。六十年。五月。臺灣奸民朱一貴等聚眾倡亂。總兵歐陽凱帶兵往捕。被殺文武各官俱乘舟奔澎湖。游擊劉得紫副將許雲俱戰死。把總楊泰降賊。七日而全臺陷。朱一貴偽稱中興王。建元永和。大封群賊。公侯太師將軍總兵以千計。淡水營守備陳策團練義勇固守要害。待援軍至。○六月。水師提督施世驃時在廈門聞警。即率兵抵臺灣。鹿耳門前鋒林亮董方砲擊破賊。取安平。賊數萬來犯。擊走之。逐北至府城。分兵敗西南兩路賊。楊泰自賊

中脫歸太兵乞為鄉導淡水營守備陳策南下諸羅與太
兵合北路賊黨潰散朱一貴走灣裏溪為村民禽獻餘黨
先後出降臺灣平其敗逃之游擊周應龍及知府王珍等
訊治伏誅擢淡水營守備陳策為臺灣總兵官加左都督
○八月臺灣怪風暴雨流火燭天海水皆立陸地地震船
壞宅毀歷溺死者數千施世驃驚悸疾作卒于軍○十二
月四川總督岳鍾琪勦撫郭羅克番連擊敗之克三十寨
番人縛首惡出降○壬寅六十一年正月宴滿漢文武大
臣及致仕休退人員年六十五以上者三百四十人於乾
清宮前御製七言律詩一首命與宴者各作詩紀盛名曰

千叟宴

千叟宴詩○二月命富寧安將太兵移駐烏魯木齊從阿
喇衲之言也○九月上北巡駐蹕熱河○十一月上不豫
自南苑回駐暢春園尋崩在位六十一年改元者一曰康
熙壽六十九以遺詔第四子即位是為世宗憲皇帝

雍正帝

世宗憲皇帝諱胤禛聖祖第四子母皇后吳雅氏嘗夢月
入懷華彩四照已而誕幼耽書史立就萬言書法適雅妙
兼衆休籌度事理評騭人材燭照如神性尤純孝本乎至
誠初封多羅貝勒和碩雍親王○癸卯雍正元年正月上
諭大學士等曰國家養育人材首重翰苑必當立品端方
居心敬慎聞有僥倖之徒平昔結黨營私至科場年分互

此風斷不可長

青海反

相援引請託遇謹守之人畏法不肯通反相排抵飛語誣陷此風斷不可長太學士張鵬翮尚書田從典徐元夢左都御史朱軾等官不安本分有玷官箴其解退回籍○十月青海羅卜藏丹津反誘降諸部自號達賴渾台吉以統之發兵擊不從已者犯西寧抗官兵命川陝總督年羹堯為撫遠大將軍率兵討之時厄魯特兵圍鎮海堡都統武格等擊走之賊復劫奪新城堡殺守備李國強等肆行擄掠羹堯率兵往剿賊遁○甲辰二年二月封明裔真定知府朱之璉為一等候世襲○年羹堯與岳鍾琪率大兵往剿青海岳鍾琪晝夜兼行直搗羅卜藏丹津之帳賊倉皇

大潰羅卜藏丹津衣番婦衣騎白駝遁官兵窮追日行三

百里數日至桑駱海

青海西藏交界處在河源西七百餘里當木魯河之北正樹土司之西

兩不

紅柳蔽天路盡而回賊已于噶爾孫河

在布隆吉河之北其下流

至數哩城外

橫越戈壁北投進噶爾俘其母及弟妹諸頭目斬

賊八萬降男婦數萬獻俘京師青海底定尋遣岳鍾琪以

兵二萬討西寧番

唐石堡城南臨大通河

降之○九月巡撫陳世倌

回教不敬天地不祀神祇

立昭忠祠

疏言左道惑民律有嚴禁如回教不敬天地不祀神祇別立宗主自為歲年黨羽衆盛濟惡害民請概令出教毀其禮拜寺不許○立昭忠祠祀開國以來致命有功者○乙巳三年正月定布隆吉爾為安西鎮○二月臺灣鳳山縣

讀一八八八讀水卷之五

七十三

南路中前生番歷歷等五社北路山後生番八里岡等六十五社等處歸化○丙午四年五月改皇弟允禔名為塞思黑先是允禔引允禔允禔為黨糾合術士匪徒陰謀篡奪至是發覺勅俱行拘禁允禔聖祖第九子允禔聖祖第一子允禔聖祖第十子允禔聖祖第十四子○丁未五年九月新平裸賊投誠○厄魯特策妄阿拉布坦死子噶爾丹策零立狡黠好兵如其父屢犯邊○戊申六年總兵張耀祖進勦米貼裸賊賊首祿永孝降○後藏阿爾布巴作亂圍困布達拉喇嘛前藏頗羅鼐率所部兵直抵後藏平之斬阿爾布巴詔命頗羅鼐管轄前後藏○岳鍾琪撥兵擒喇汝窩逆番了馬車斬之賊黨

征準噶爾

番疆底定○己酉七年正月提督黃廷桂定平盧阿照等洞寨一百餘處巡撫張廣泗擊丹江雞江生苗降之上下九股及古州等處苗眾以次寧貼○三月以傅爾丹為靖遠大將軍屯阿爾泰山出北路以岳鍾琪為寧遠大將軍屯巴里坤出西路以征準噶爾告太廟堂子上御太和殿行授鉞禮先羅卜藏丹津之投準噶爾也策妄阿拉布坦納之朝廷遣使索獻不奉詔後羅卜藏丹津謀殺策零事覺被執至是策零遣使表獻丹津中途聞師出而止○八月巡撫蔡士胤奏進湖州民王文隆家萬蠶同織一幅長五尺八寸寬二尺三寸自然成就不由人工○庚戌八年

萬蠶同織

六月諭進兵之期暫緩一年。年鍾琪傳爾丹來京面授方略。○十二月策零乘西路軍營無備遣賊二萬餘犯科舍圖。總兵樊廷副將冶木雄等以兵二千轉戰七晝夜奪回駝馬大半。○辛亥九年四月傳爾丹進城科布多。科布多河在阿爾泰山之東北三百里策零遣兵三萬犯北路破我前鋒直薄太營。諸軍遂大潰。惟滿兵四千衛輜重且戰且退。渡哈爾納河副將軍巴賽查納弼以下皆戰死得還科布多者二千人。賊獲我士卒皆穿脛盛以皮囊繫馬後唱胡歌而返。詔降傳爾丹為振武將軍以順承郡主錫保代之。移科布多營於察罕度爾。在科布多東南二百里○九月策零兵乘勝謀東犯喀

爾喀乃取道阿爾泰山南額爾齊斯河而進。策零擁兵二萬于蘇克阿勤達以援應。我兵宵入賊營挑戰誘其來追。伏兵擊之大破其眾。乃于推河翁金河及拜達里克河三處各築城以扼山南之衝。拜達里克河在推河西二百里。推河在鄂爾坤河西二百里。翁金河在鄂爾坤河東南三百里○壬子十年五月雲南思茅土把總刁興國叛煽動元江夷人圍攻並洱府。又通苦惹犯他郎地方。元江把總康夫錫陣亡。○七月山東鉅野縣民李恩家牛產瑞麟。麟身牛首遍身皆甲。甲縱有紫毫玉蹄文頂光彩爛生。○噶爾丹策零親率大衆由北路入寇潛至抗愛山胡土克圖之地探知額駙策凌軍赴本博圖山遂襲其帳。

牛生瑞麟

策凌大破
策零

于塔密爾河盡掠子女牲畜策凌中途聞之即誓天反旆
 馳救並急報順承親王請師夾攻策凌部下有脫克渾者能晝夜行千里盡得賊
形勢虛實歸報以為鄉導策凌以兵三萬繞間道出山背襲賊追擊于
 喀喇森齊泊大戰二日大敗之賊走保鄂爾昆河之抗愛
 山古燕然山也我兵薄險蹴之呼聲震大漠賊三萬擊斬其半
 擠墜溺死亦半河水為赤我兵僅傷十餘以無兵夾攻故
 噶爾丹策零乘夜突圍遁盡弃輜重牲畜策凌急檄馬爾
 賽于拜達里克河邀其走路馬爾賽不應捷奏詔斬馬爾
 賽及附和阻繞之都統李杖以徇降順承親王爵以多羅
 平郡王福彭為定邊大將軍額駙策凌副之○召岳鍾琪

還降三等侯命大學士鄂爾泰督巡陝甘經畧軍務以總
 督張廣泗護寧遠大將軍○癸丑十一年總督高其倬遣
 兵攻剿普思逆賊刁興國及土目楊昌祿等擒斬梟示○
 雲督尹繼善奏言賊酋刁輔國等投誠隨軍効力已攻破
 賊柵十五招降夷民八十餘寨其遁匿餘黨分路圍勦務
 在廓清臣惟非兵不足示威恃兵又無以善後所期恩威
 並濟撫縱得宜庶邊圉永寧矣諭曰剿撫名雖二事恩威
 用豈兩端當撫者不防明示優容當剿者亦宜顯施斬馘
 俾其知順則利而逆則害方可期近者悅而遠者來今此
 目前攻心之師即寓將來善後之舉是乃仁術非關詐謀

寧止綏靖普思將見信孚莽緬也○以查郎阿署定遠大將軍張廣泗副之○甲寅十二年雲督尹繼善進剿普思擒斬賊首神仙喃奔等二百餘招降八千餘攸樂思茅一帶俱蕩平○張廣泗破準噶爾兵于布隆吉大坂斬首四百獲糧馬器械無算○乙卯十三年三月噶爾丹策零遣使請和詔策凌查郎阿來京與王大臣議之策零欲得阿爾泰山故地廷議不許使命往返始定議以阿爾泰山為界厄魯特游牧不得過界東喀爾喀游牧亦不得過界西厄魯特平定○五月召拱古州鎮南逆苗猖獗黃平施秉一帶地方俱遭擾害授貴州提督哈元生為揚威將軍討

征逆苗

之命果親王允禮皇四子寶親王及大學士鄂爾泰張廷玉戶部尚書公慶福尚書魏廷珍憲德等俱辦理苗疆事務○六月授湖廣提督董芳為副將軍與哈元生辦理剿撫機宜○七月廣西提督霍昇總兵王無黨等率兵七千入古州剿殺逆苗七次斬獲甚多尋大兵分路進剿焚賊寨數十殺逆苗千餘生擒賊首阿九汪桂等清平黃平餘慶平越等處俱定平○八月哈元生奏自五月以後遣發各省官兵進剿雞溝丹江橋貢召拱柳羅清江俱已開通軍聲大振痛加剿除其有實係脅附者許其悔罪投誠上諭曰慎無姑息以貽後患○上崩在位十三年改元者一

續通志卷之五

四一四

乾隆帝

曰雍正皇太子即位是為高宗純皇帝

高宗純皇帝諱弘曆世宗第四子世宗遺詔以莊親王允祿果親王允禮大學士鄂爾泰張廷玉為輔政○十月授

湖廣總督張廣泗為七省經略逮張照薰芳哈元生等治

罪廣泗乃簡選將士面授方畧以兵四千攻上九股四千

餘攻下九股自統五千餘攻清江下流各寨號令嚴明所

向克捷○丙辰乾隆元年正月張廣泗復增兵分八路排

牛皮大箐
番夷平

勦逆寨罔不蕩平其遺孽盡竄牛皮大箐

牛皮大箐盤亘數百里北丹江

南古州西都勻八寨東清江名拱危巖切雲老樾蔽天霧雨冥冥泥潦蛇虺所國雖近地苗蕃亦無能悉其幽邃窮其荒阻者故首逆諸苗咸藪伏其中特官兵所萬不能至俟軍退復圖出沒廣泗檄諸軍分扼

箐口以坐困之又旁布奇兵箐外以截逋逸合圍進逼將

士冒榛莽以搜剔斬捕由是熟魁罔漏俘馘萬計其飢餓

顛墜死厓谷間者不可勝計乘勝搜勦附逆熟苗共燬千

二百二十四寨撫三百八十八寨陣斬萬七千餘俘二萬

五千餘收其叛產設九衛屯田養兵屯詔以廣泗總督貴

州兼管巡撫事世襲輕軍都尉自是南夷遂不反○巳未

四年準噶爾策零請通市及進藏煎茶許之○庚申五年

湖南靖州武岡徭城步橫嶺苗與廣西徭同叛總督班第

總兵劉策名以兵進剿平之猶土司之未改流者廣西貴

州雲南四川之間有百六十八四川青海之間亦有數十

厄魯特通市

續十代史略卷之五

四十五

土司世襲俱以宣慰宣撫按撫長官土司土府土州土縣等官世世承襲其貢賦或比年一貢或三年一貢各因其土產○乙丑十年噶爾丹策零死次子那木札爾嗣汗位童昏無行諸台吉殺之立其庶兄刺麻達爾札阿睦撒納潛入伊犁

厄魯特策零死

厄魯特汗之都城襲殺刺麻達爾札阿睦撒納為輝特台吉居雅爾雅爾即塔爾巴哈臺在伊犁東北一千九百里○丁卯十二

金川叛

年金川土司莎羅奔叛金川水出松潘徼外西藏地有大金川小金川皆以臨川山有金礦

得名二水均自東北而西南至明正土司地合流為寧遠府之若水至會理州為金沙江亦名瀘水隋始置金川縣唐維州地也明隸雜谷安撫司改革布什札及明正土司巡撫遣兵彈治不奉約反傷我官兵詔雲貴總督張廣泗率兵三萬自河

東西進勦阻險不前復增兵萬○戊辰十二年副將張興等通莎羅奔戰死諸將多失事機大學士公訥親往視師廣泗輕訥親不和自五月進兵至八月未得寸進方攻拉底山我兵三千皆潰詔逮廣泗至京斬之訥親軍前賜死命大學士傅恒經略又起用岳鍾琪傅爾丹俱征勦傅恒至軍即斬將士為內應者增調鄰省兵刻期進擊○己巳十四年傅恒及岳鍾琪兩路連克碉卡音澗石室也金川番人皆居石室塘從納切據險隘立軍聲大振莎羅奔父子大怖遣人詣岳鍾琪乞降惟畏死不敢出初鍾琪為川陝總督時勘金川與沃日各土司爭界事區畫甚公莎羅奔故隸鍾琪麾

金川平

畫功臣像

下奏給土司印甚德之至是乞降于鍾琪鍾琪輕騎徑抵其巢莎羅奔父子見其親至則大喜悉聽約束從鍾琪詣大軍傅恒責其抗命莎羅奔等叩額誓遵六事歸土司侵地獻凶首納軍械歸兵民供徭役乃宣詔赦其死諸番悉平○畫五十功臣像于紫光閣○辛未十六年正月皇太后六旬上誕上躬奉皇太后駕幸盛京率天下臣民舉行大慶禮○三月上諭曰經史學之根柢也會城書院聚學庠之秀而砥礪之尤宜示之正學朕時巡所至若江寧之鍾山書院蘇州之紫陽書院杭州之敷文書院各賜武英殿所刊之十三經二十二史一部資髦士習古之學○帝

巡幸江南○癸酉十八年緬甸入貢初茂隆場商吳尚賢說緬入貢緬酋麻哈祖遣使以馴象塗金塔至京進獻錫賚如例吳尚賢旋被滇吏借事斃諸獄於是茂隆銀場衆皆散○甲戌十九年緬酋麻哈祖為木疏土司雍籍牙所篡木疏土司稱相傳一千七百餘年其先世雍由于漢和帝永元九年受印綬唐有雍堯明有雍宰今有雍籍牙皆一姓相傳之證桂家木邦二土司不服遂治兵相攻桂家敗竄襲殺孟連土司總督吳達善使人誘戮桂家土司而木邦土司亦兵敗走死于是緬酋日犯我諸土司境○土爾扈特遣使入貢土爾扈特厄魯特族明季與厄魯特不睦西投俄羅斯俄羅斯以裏海額濟勒河之南與遊牧○阿睦撒納襲殺都爾伯特台吉達什降其子納

阿睦撒納
內附

默庫自遷帳於額爾齊斯河。額爾齊斯河在阿爾泰山之南二百里科布多之西三百里雅爾之東烏魯木齊之北各八百里平定後為屯田之所屢掠伊犁邊境達瓦齊自領精兵三萬八千夾攻阿睦撒納不能抗遂與納默庫共率所部兵民二萬餘東奔叩關內附先是達什宰薩喇爾三車梭等皆來降上納其降俾暫游牧於喀爾喀之札卜堪河。札卜堪河受烏里雅蘇河之水西流至科布多境入于泊阿睦撒納入覲熱河備言伊犁可取狀上大喜封親王既而準部驍將瑪木特知至準噶爾事不可為亦脫身來歸上遂決意征準部○乙亥二十年二月兩路出師班第為定北將軍出北路阿睦撒納副之永常為定西將軍出西路薩賴爾副之兩路

征準部

軍各二萬五千馬七萬匹西路出巴里坤北出烏里雅蘇臺各部落望風崩角其同族大台吉噶爾藏多爾濟舊回首和卓木先後迎降于是所至諸台吉攜醢酪獻羊馬絡繹道左師行數千里無一人抗顏者長驅至博羅塔拉河距伊犁三百里軍皆會。博羅塔拉河在伊犁東北三百里為南北兩路會合之區山川水草形勢皆勝故逆叛後即踞此地以號召南北瓦達齊自率宿衛兵萬人走保伊犁西北之格登山大兵爭渡伊犁河追擊將及格登山夜遣降夷阿玉錫等率二十餘騎往覘道路阿玉錫即乘夜突搗其營拍馬橫矛擐纛大呼賊瓦解達瓦齊以二十餘遁餘皆不戰降黎明我二十餘騎遂收其衆七千餘還大

二十餘騎
收七千

阿睦撒納
反

營達瓦齊踰冰嶺南走回疆其下半途逃散僅餘百騎奔
 烏什城霍吉斯霍吉斯已承我將軍檄即執之以獻并獲
 前青海叛賊羅卜藏丹津獻俘京師赦阿睦撒納死封雙
 親王○八月阿睦撒納叛據伊犁四出煽亂班第鄂容安
 等被圍死之將軍永常退軍移糧北路無聲援賊益猖獗
 命逮永常治罪以策楞代之○丙子二十一年二月策楞
 至伊犁賊已遁入哈薩克策楞頓兵不進復以達爾黨阿
 代之達爾黨阿擊破哈薩克阿睦撒納易服潛遁我兵追
 及相隔一谷僅二三里賊令哈薩人佯告欲禽獻賊但需
 其汗至乞暫緩師待時我師爭欲進捕達爾黨阿不可賊

徐賜去我軍頓兵數月無要領諸部降賊逮策楞達爾黨
 阿罪之定邊右副將軍兆惠率兵駐防伊犁轉戰而南屢
 戰殺賊○丁丑二十二年正月兆惠至烏魯木齊諸賊皆
 會連日數十百戰我兵無不一當百疲困甚進至特訥格
 不復能衝擊乃結營自固賊急圍困會侍衛圖倫楚率兵
 二千間道往迎圍乃解兆惠得新兵復往剿巴雅爾部落
 始回巴里坤○三月命定邊左副將軍成衮扎布出北路
 右副將軍兆惠出西路征剿之會諸部落亦自相吞噬且
 痘疫盛行死亡相望兆惠兵復長驅至賊皆敗走逆首先
 後授首兆惠等窮追至哈薩克

哈薩克分左右三部左部
 在準噶爾西北右二部在

續一八

哈薩汗入貢

準部底定和卓木反

準噶爾西皆比界俄羅斯東去塔爾巴哈台各南去伊犁皆
 千里其左部曰鄂爾圖玉斯東西千里南北六百里環繞
 皆山西北境曰伊什河地苦寒其汗惟盛時哈薩克汗阿
 夏往居之風俗物產文字同準部言語異
 布賚懼招大兵遣使入貢哲禽賊以獻適阿睦撒納率二
 十人往投阿布賚先使人收其馬阿睦撒納驚徒步夜走
 俄羅斯界我朝移檄索之是冬報阿睦撒納患痘死於是
 命成衮札布鎮烏里雅蘇臺準部底定○回部和卓木自
 立為巴圖爾汗傳檄各城招降回戶數十萬皆靡回部天
 山南路
 也天山葱嶺正幹延袤數千里抵哈密其左右為準回兩
 部南北分路於哈密雪山之陽冬夏湧流數十川貫穿於
 南路各城而匯於蒲草湖為中國黃河之潛源其間有城
 堡數百即漢書所稱三十六國之地也其喀什噶爾即古
 疏勒漢唐以來西域建庭之所計回疆東西六千餘里
 南北千餘里其土人今皆奉回教故是為回部如回疆惟

征回部

庫車城主鄂對奔伊犁求救兆惠令鄂對從伊敏圖率兵
 往勦未至庫車中途鄂對等聞親族被僇賊兵固守庫車
 請急歸待大軍而後進伊敏圖不從馳入庫車為賊所害
 鄂對等逃還○戊寅二十三年準部鄂拓克復叛誘陷都
 統滿福命兆惠富德兩路進勦○命雅爾哈善為靖逆將
 軍將滿漢兵萬餘率鄂對等由吐魯番進攻庫車和卓木
 兄弟率兵萬餘來援我領隊大臣愛隆阿等迎擊半途殲
 其前隊三千又禽斬千六百奪其大纛截其歸路和卓木
 入保庫車城鄂對請扼走路將軍雅爾哈善不為備終日
 棋奕和卓木將走守兵告之將軍復不信賊宵遁提督馬

續一八

五十一

得勝穴地攻城城兵反擊其外而實藁焚之我兵六百餘
焦馬上震怒誅雅爾哈善馬得勝以狗時將軍兆惠來京
自請留軍以竣西事上壯之乃命移師而南時小和卓木
奔葉爾羌即漢莎車國大和卓木奔喀什噶爾即古疏勒漢唐以來西域建庭
所師至葉爾羌城大不能圍攻結營城東以伺間遣兵扼
喀什噶爾接路兆惠自率千餘騎取賊糗糧賊以萬五千
夾攻我兵且戰且退兆惠左右衝突馬中槍再斃再易總
兵高天喜等戰歿賊築長圍困我兆惠遣人赴阿克蘇告
急會布魯特掠喀什噶爾我軍縱火攻焚賊營賊疑布魯
特與我有約大和卓木乃使人議和兆惠執其使射書諭

土爾扈特
降

以必先縛獻○土爾扈特汗烏錫巴率七萬餘口來降乃
賜哈拉沙地為其遊牧以著勒土斯土為王廷開都河兩
岸廣沃可耕可牧如其故地乃封烏錫巴為汗其弟親王
餘郡王貝勒公台吉有差土爾扈特在哈薩克部之北○已卯二十四
年富德在北路聞兆惠急報率兵三千餘赴援賊兵五千
餘邀戰擊破之進渡葉爾羌河賊復拒戰富德不能進適
阿里衮以兵六百解駝馬數千夜至與富德兵合奮蹙賊
自相格殺潰遁我師長驅進兆惠見賊圍日少知援軍至
即勒兵潰圍殺賊千餘兩軍會合振旅還阿克蘇○布魯
特諸部落內附遣使巡其部落同內地焉

布魯特部
落內附

布魯特分東西
部東部在天山

討和卓木

北準部之西西距伊犁千四百里持教同回部游牧無城郭其疆域風俗皆介準回之間人貧而悍輕生重利害厲掠雖厄魯特強盛時亦不能馴服之東部烏孫西部古所謂塞王種也西部南屬葱嶺東連疏勒唐時為大小勃律

○庚辰二十五年兆惠富德率兵三萬兩路並進和卓木遂弃城驅人畜逾葱嶺西遁欲投教罕安集延教罕葱嶺以西回國

也有四城俱當平陸最西為教罕城其渠居之最東曰安集延去喀什噶爾城五百里漢書謂自疏勒西踰葱嶺則出大宛康居諸國疏勒今喀什噶爾城從其城西踰葱嶺為出安集延之道安集延諸城土著耕田有城郭廬室富強善賈善戰亦大宛遺風先遣使往而教罕不報乃赴巴達克山巴達克山克山

葱嶺西南回國也去葉爾羌千餘里西北至伊西洱河有城郭負山扼險戶口十餘萬我先鋒千餘騎追至戰于霍斯庫嶺斬賊五百霍斯庫嶺即葱嶺之巔有黑龍池周數百里回語哈喇淖爾即佛經所謂阿耨達也又破阿爾楚山追攻二十餘里斬賊千

巴達克山納款

餘又三日至伊西洱庫河乃巴達克山界河兩涯皆山和卓木據山扼我追兵我兵擊大敗之凡降賊萬二千獲牲畜萬計兩和卓木僅挈其妻孥數百人走巴達克山初和卓木之擁眾而西也本謀據教罕及巴達克山等國而教罕不納往巴達克山以其酋不親迎怒斬其使欲約隣部擾之於是巴達克山酋興兵拒戰于阿爾渾楚嶺禽其兄弟時將軍富德進軍瓦漢城移檄索賊巴達克山酋素爾坦沙大懼馳獻其馘率所部十萬戶及鄰部博羅爾三萬戶俱納款於是愛烏罕愛烏罕在巴達克山之西亦大回國也其汗所都曰堪達哈城地廣數千屯北界布哈爾南界溫都斯坦東界巴達克山勝興兵十五萬惟火銃刀矛無弓矢重農桑鮮物采名文物

續通志卷之五

愛烏罕入

貢

回部悉平

貢

愛烏罕入

師問殺和卓木之罪。巴達克山汗懼，乃貽中國文綺，具言和卓木負中國及擾已國之罪。愛烏罕遂與連和，遣使入貢。回部悉平。明年二月，王師凱旋，於是葱嶺以西，布魯特、愛烏罕、博羅爾、敖罕安集延、巴達克山諸國皆遣使來庭，以喀什噶爾為參贊大臣，建牙之所，節制南路各城。大者設辦事大臣，小者置領隊大臣。○甲申二十九年，回部烏什民作亂，先是準噶爾敗烏什酋霍吉斯俘達瓦齊，以獻受王封。及二和卓之亂，霍吉斯頗持兩端，上恐其反覆，不可專任，召入京，以哈密阿布都拉代之。阿布都拉暴戾無親，虐使兵民，辦事大臣蘇成亦酗酒宣淫，不治事於

烏什作亂

是部民數百人相聚謀變，一人奔告阿布都拉，叱逐之，又數人相率走投，駐劄大臣署亦叱拒，不納。民遂作亂，殺阿克蘇、布都拉、蘇成及守兵阿克蘇、辦事大臣卡塔海。聞變，即領兵五百赴烏什，烏什開城出迎，即令舉兵，城復閉。逾二日，又以礮攻城，於是城中皆叛，聽阿刺布圖號令，馬步二千餘出戰，卡塔海敗走。又敗庫車大臣鄂寶之兵，喀什噶參贊大臣納世通、伊犁將軍明瑞各以兵赴援，會卡塔海以誤軍機伏法。官軍晝夜攻城，賊潛遣其黨煽各回城，並乞援于敖罕、布魯特。遠近洶沸，時葉爾羌鄂對之妻葉依木以其子鄂斯在庫車，置酒盡，召諸將士，責以忠義利害，歌

續通志卷之五

五十三

舞盡醉而陰遣人赴收其兵器又盡縱其馬人心始定得不黨賊其餘回城亦不敢動于是賊無外援我兵薄擊賊盡縛首逆以降官兵入城殲其黨羽烏什平烏什在庫車西北千里戶口數萬又回疆一大都會也○乙酉三十年緬酋雍籍牙因桂家木邦孟連耿馬諸土司互相戰殄益無忌憚乃令孟良酋犯我車里土司時承平日久民不知兵普洱永昌邊外一日數驚總兵劉得成參將何瓊詔游擊明浩等三路皆敗命劉藻代吳達善為總督常鈞為巡撫束手無策藻自刎死○丙戌三十一年詔總督阿爾泰往勦金川先是莎羅奔兄子郎卡主土司事漸桀驁逐澤旺及革布什札土司總督

開泰檄諭而郎卡侵鄰境不已阿爾泰姑息但諭返諸土司侵地即以安撫司給郎卡郎卡死其子索諾木與僧桑格侵鄂克什土司地○詔太學士楊應琚自陝西移督雲南應琚至永昌移文檄緬言天兵數十萬陳境上不降即進討緬賊聞乃大出兵攻水邦景線皆陷之副將趙宏榜以兵數百襲克新街燒器械輜重走還銅壁關賊數萬尾而入應琚疾遽起詔兩廣總督楊廷璋赴滇治應琚軍○丁亥三十二年提督李時升調兵萬四千進剿木邦新街等處賊佯遣人議和而分兵繞入萬仞關圍永昌騰越各邊營壘烏爾登額劉德成赴援賊復乞降以緩我師而

乘間襲孟卯城土司拒守八晝夜援兵始至賊潰走浮猛
卯江而逸雲貴總督明瑞參贊額爾景額提督譚五格等
率滿兵三千漢軍二萬餘會于阿瓦進至木邦賊戍望風
先遁留兵守之明瑞率兵萬餘渡錫箔江賊立十六柵以
待領隊大臣觀音保哈國興等進連破四柵十二柵之賊
皆宵遁乘勝全軍競進夷境益峭險馬乏草牛踣途無糧
可掠與北路軍會合俱向孟籠果大獲糧時軍已深入二
千餘里○戊子三十三年征緬諸將以糧盡道險議取道
太山土司向木邦歸賊衆來追我兵且戰且退日行不三
十里賊復悉衆來追我兵設伏擊破之賊復不敢近明瑞

趙翼論總
督明瑞

休軍蠻化數日賊蝟集數萬來圍諸將血戰萬賊中無不
一當百俄領隊大臣札拉豐阿中鎗死巴圖魯侍衛皆散
明瑞觀音保死之上以額爾登額總督鄂寧等不往援皆
礮死之武進趙翼曰方明將軍之自緬退師也賊隨處可
調兵而我無後繼賊隨處可取糧而我無續運賊以一象
馱一礮而我則兵械火具日少一日當戰苦時槍礮聲如
百萬爆竹同時迸裂對面不聞人語也然六十日中未嘗
一敗其中又有蠻化之大捷每晨起即躬自督戰糧久絕
僅啖牛炙一臠猶與帳下親兵共之有傷病者令舁以行
不忍棄故雖極困憊無一人有怨志其死也非不能自拔

歸蓋以阿瓦未破懼無以返命雖上有全師速出之旨而
路阻不得達故結隊徐行持重自固使賊不能覆我直至
小猛育距宛頂不過三百里度將士皆可自達然後自以
身殉方軍勢日蹙時謂諸將曰賊已知我力竭然必決死
戰者正欲賊知我國家威令嚴明將士用命雖孤軍援絕
無一人不盡力度賊知所畏憚而後來亦易於接辦此其
謀國之深尤非慷慨徒死者可同日語矣四月中賊歸停
卒求和時余忝參戎幕距明將軍殉節時不過數月滇民
及從征軍士言及將軍無不墮淚者其得人心雖古名將
不能過也○五月緬酋歸停卒許爾功等八人持貝葉書

征緬甸

附以楊重英書及木邦頭目苗溫書乞罷兵不許命大學
士傅恒為經畧阿桂阿里衮皆為副將軍明德為總督哈
國興為提督大舉征緬以明年二月發京○己丑三十四
年四月經畧傅恒至永昌兵衆軍器刻期雲集傅恒啓行
渡曼鳩江亦曰蘭鳩江亦曰濱郎江金沙江之上流而西孟拱孟養諸土司望
風出迎蠻暮野牛壩所造戰艦成閩粵水師亦集迎傅恒
軍即由蠻暮江出金沙江賊已列舟扼江口水陸來犯我
兵奮戰賊大潰殺溺數千大兵進攻老官屯我師逼其東
寨寨據大坡周二里柵皆鉅木外周以三濠濠外又橫臥
大樹銳其枝末外向此緬夷拒敵之長技也我軍先以大

礮擊之遇木輒洞而柵不塌。偶折輒補。又屬生革為長組。鈎之力急。組輒斷。乃伐數百丈。老藤鈎柵曳之。為賊斧斷。又挾膏薪抵柵。柵木沾潤不能熬。最後穴地充藥轟之。柵突起丈餘。賊號駭震天。我軍皆挺刃以待。俄柵忽落。平不復動。然賊自是震懼。阿桂又自通江水門越柵。截其西岸。應援之賊。賊帥乃遣人來議款。哈國興單騎入賊柵。定議而還。於是緬酋遣使詣傳恒饋獻。自陳請入貢。遂焚舟。鎔大礮。班師時。班師命亦至。是時選木邦孟拱蠻 ○庚寅三十五年。經畧傳恒還朝。即病卒。鄂寧亦卒于永昌。老官屯。目移書索木邦孟拱蠻。三土司阿桂遣都司蘇爾相賈。

討金川

檄答之。復被留。○辛卯三十六年。敕阿桂遣偏師擾緬邊。阿桂奏言。蠻幕木邦孟密三土司。外始為緬地。距邊已二千餘里。偏師不可深入。若出近邊。則所殲乃野人濮夷。與緬無損。不如休息數年。外約暹羅。暹羅緬之東南界 同時大舉。上以大舉非計。乃罷阿桂。以溫福代之。緬連年抗中國。耗費不貲。又雲南閉關罷市。緬東南用兵。遂併暹羅。○小金川。索諾木誘殺革布什札。上官僧桑格攻鄂克什及明正土司。命大學士溫福自雲南赴四川。以尚書桂林代阿爾泰為總兵。討之。溫福由汝川出西路。桂林由打箭爐出南路。賊僧桑格割地求援于索諾木。索諾木潛遣兵助逆。○壬

辰三十七年桂林克復革布什札土司故地温福克資里
及阿哈桂林遣將薛琮等率兵三千裹五日糧入墨龍溝
賊截其後路我兵告急而桂林不赴援我全軍陷沒乃以
阿桂代桂林為參贊大臣赴南路阿桂以皮船宵濟連奪
險隘遂直搗賊巢僧桑格已送其妻妾于大金川而自赴
底木達澤旺閉門不納遂竄入大金川我軍至底木達俘
澤旺擄索諾木縛獻不應上命温福為定邊將軍阿桂豐
仲額為副將軍一舉滅之○癸巳三十八年温福以賊扼
險不得進別取道攻昔嶺駐營木果木令提督董天弼分
屯底木達以守小金川之地索諾木陰使小金川頭目煽

曰此地迺先人故物珍瑤不急之物悉聽而歸地歸我兵
始罷荷蘭乃降送之歸國諸土酋皆受約束改為安平鎮
赤嵌城為承天府禮處士陳永華為謀主闢屯墾修戰械
制法律定職官興學校起池館以待明宗室遺老之來歸
者臺人大集鄭氏遂安○十一月帝在緬甸平西王吳三
桂率兵薄擊帝賜三桂書諭之緬酋恭應時執帝獻三桂
軍三桂殺華亭侯王維恭等百餘人奉帝還滇以五華山
舊宮為行幄頗極增崇侈麗○壬寅十六年五月延平郡
王招討大將軍朱成功卒于臺灣年三十九臺人以其弟
襲為講理成功計至島經嗣位清靖南王耿繼茂遣人招

朱成功卒

諭議炤琉球朝鮮例不登岸不雉髮不易衣冠乃遣人通
 好不報○十月鄭經帥師往臺灣黃昭奉襲拒經經財昭
 殪衆遂巡稅甲經遂入臺收殺主謀者餘真不問待襲如
 初○癸卯十七年先是鄭經居島與乳媪通生子成功聞
 之大怒遣使至島諭鄭泰監殺經及經母董知成功病革
 或亂命不從及經入臺泰潛結黃昭拒經事覺經乃佯置
 酒邀泰縊殺之泰子纘及弟鳴駿亡歸清將士先後歸清
 者多矣于是清主銳意南掠令將士分道疾進經分部死
 士禦之衆寡不敵退守銅山清兵入島墮兩城自是之後
 族屬將士大抵皆降于清獨有陳永華馮錫範等及經還

教匪王倫
 作亂

我兵步步立柵以次進逼遂據瑪爾古山盡奪要害噶爾
 厓即在其下番衆及索諾木母姊出降惟莎羅奔索諾木
 及心服死黨皆在圍中明亮富德狗下各路皆會于噶爾
 厓○山東袁州府壽張奸民王倫作亂王倫初以清水邪
 教往來山東號召無賴亡命徒黨日衆夜襲城戕吏時承
 平日久官民皆不習兵賊連陷堂邑及陽穀今趨臨清東
 昌劫掠總兵惟一以兵三百擊賊堂邑復以兵八百擊賊
 柳林皆不利賊據臨清舊城惟一以兵三千戰城外復敗
 走東昌詔斬惟一以徇各郡援兵漸集圍城數重賊登樓
 縱火死復殲女賊烏氏等數十生擒其弟王樸等檻送京

續

金川平

此書今當理上不至

回教徒亂

此書今當理上不至

續

桂佩欽差大臣關防赴剿蘭州城西南偏山為賊所踞臨
高俯瞰眾雖千餘皆新教死黨素業射獵精火鎗又負地
險官兵萬餘皆營于城東與賊遠隔屢屢挫銳每夜驚擾
阿桂至軍首營山上斷賊赴城之路而柵山北至河岸以
聯聲勢漸移城中城東之兵進逼賊巢遂奪其險築長圍
斷汲道賊已窘急乃填濠四入斬首逆餘賊悉平○暹羅
國王鄭昭子華嗣立亦材武緬首孟雲不能支乃東徙居
蠻得華遣使航海來貢告捷○丙午五十一年詔封鄭華
暹羅國王○臺灣彰化縣民林爽文作亂初爽文居彰化
大理杙地險族強豪猾揮霍聚羣不逞之徒結天地會數

臺灣亂

十年將吏務為覆蔽不問黨日橫熾總兵柴大紀調兵三
百使知府孫景燧彰化知縣俞峻等往捕駐營五里外勒
村民禽獸先焚無辜數小村怵之爽文遂因民之怨集眾
夜攻營軍覆將吏皆死彰化遂陷賊移眾陷諸羅殺知縣
及淡水廳同知而鳳山盜莊大田亦陷其縣賊分路犯府
城柴大紀兵備道永福等擊殺賊千餘○丁未五十二年
正月水師提督黃仕簡陸路提督任承恩副將徐鼎士各
以兵渡海至黃仕簡檄大紀北取諸羅郝壯猷南取鳳山
壯猷至鳳山城已空招民復業賊混其中城復陷游擊鄭
嵩死之壯猷遁歸府城兩提督觀望遠巡坐失事機命總

續十八史略續本卷之五

七十一

督常青為將軍往督師以李侍堯為浙閩總督調江南數省兵往勦江南提督藍元枚福州將軍恒瑞均為參贊分赴府城鹿港斬郝壯猷以徇賊目莊錫舍亦以二千人降藍元枚病卒常青恒瑞離城十里遇賊萬餘交綏即退泉人住臺者初不從賊至是泉人悉附于賊而賊勢不可支旬日十餘萬莊大田驅以攻府城林爽文驅以攻諸羅爽文以諸羅據南北之中必欲陷之柴大紀力守前後百戰殺賊數萬屢出奇兵奪其時積詔大紀為參贊大臣常青恒瑞進援畏賊勢退詔解其任以福康安海蘭察代之又命柴大紀捍衛兵民出城再圖進取大紀奏以諸羅為府

城障一朝棄去克復甚難惟固守待援上覽奏墮淚詔曰大紀當糧盡勢急之時惟以國事民生為重雖古名將何以加茲其改諸羅縣為嘉義縣封大紀義勇伯世襲罔替福康安海蘭察至臺直進衝賊陣擊大破之即日海蘭察抵嘉義城次日福康安亦至復乘勝追賊遂搗大里杙賊萬餘迎拒我兵奮擊殺賊數千克其巢爽文携家走匿其孥于生番社自與死黨數十竄箐谷皆就擒遂移師而南剿莊大田于牛莊屢敗賊追至極南之郎嶠負山隔海我舟師截其走路大兵環山圍之斬溺數千大田亦就俘臺灣平後柴大紀為福康安所劾被誅○戊申五十三年。緬

廓爾喀犯後藏

酋孟雲遣使由木邦齎金葉表金塔一馴象寶石等款關求貢并歸揚重英乃諭暹羅罷兵○庚戌五十五年緬酋孟雲遣使賀八旬萬壽乞賜封並乞開關市許之遣使賜敕印封緬甸國王定十年一貢○廓爾喀犯後藏廓爾喀在西藏西南本巴勒布國舊分三部後三部吞并為一遂與初後後藏隣東西數千里南北千餘里其都城曰陽布藏班禪刺麻來京中外施舍之財海溢山積及班禪卒於京師資送歸藏其財皆為其兄仲巴所有既不布施各寺廟與唐古特之兵又擯其弟舍瑪爾巴為紅教不使分惠于是舍瑪爾巴憤懣廓爾喀煽其入寇廓爾喀乃興兵闖邊唐古特兵不能闕而朝廷所遣援剿之侍衛巴忠將軍

鄂輝成德等陰令西藏堪布等私許歲幣以罷兵時達賴刺麻不可而巴忠擅以賊降飾奏諷廓爾喀酋入貢于是廓爾喀遣人至藏表貢鄂輝恐發覺前事屏不奏○辛亥五十六年廓爾喀以藏中歲幣爽約再舉入犯後藏扎什倫布駐藏大臣保泰等不為備禦仲巴等挈贊先遁全藏大震達刺班禪兩大刺麻飛章告急侍衛巴忠扈駕熱河聞變畏罪自溺水死鄂輝成德因盡以罪委之○石刊十三經于大學用垂永久○壬子五十七年將軍福康安參贊海蘭察進討廓爾喀五月盡復藏地六月大舉分三路進至濟隴八十里之鐵索橋賊斷橋阻險造橋奪卡追剿

征廓爾喀

續十八史

百六十里至協布魯又百數十里至東覺嶺兩崖壁立中
隔橫河水深溜急險與鐵索橋等分兵上下流為橋而渡
至雍雅山廓夷震懾遣使乞降斥之三路進攻六戰六捷
踰大山二重前後殺賊四千涉賊境七百餘里南北兩山
夾河亘橋我兵攻奪其北山破其橋北之賊其南岸大山
數十里山後即其國都陽布也賊以十營踞山守禦甚固
海蘭察欲扼河立營福康安不可逾橋攻之冒雨上山二
十餘里至斗絕處賊乘高木石雨下賊三路來犯我兵且
戰且卻死傷甚衆我兵扼橋力戰乃退賊方是時其國南
隣印度之地曰披楞久為英吉利屬國與廓夷積釁福康

安進兵時曾檄近廓夷東南之哲孟雄宋木布魯克西面
之巴作木朗南面之甲噶爾披楞等部同時進攻許事平
分裂其地及是廓夷南求援于披楞披楞佯以兵船赴援
實陰偪其邊鄙廓夷南北受大敵洵懼無計再遣人詣軍
卑詞乞哀時我師方挫而賊境益險且踰八月大雪封山
難返乃允其降盡獻還所掠藏中財物歸所得丹津班珠
爾等并獻舍瑪爾巴尸貢馴象番馬樂工請永遵約束班
師留番兵三千漢蒙古兵一千戍藏是為官兵駐藏之始
廓夷自是以後至今貢獻不絕

教匪劉之
協等賊起

其都城則
披楞也

○癸丑五十八年白蓮教匪劉之協宋之間授

甲噶爾即明史之榜葛刺
一作孟加臘久屬英吉利

亂 白蓮教徒

貴州苗民 叛

教傳徒徧川陝湖北日久黨益衆遂謀不靖倡言劫運將至以同教鹿邑王氏子曰發生者詭為明裔朱姓以煽動流俗至是發覺被執伏誅王發生以幼童免死戍新疆惟劉之協遠賜跡于河南不獲詔天下大索○乙卯六十年貴州銅仁苗石柳鄧叛湖南永綏苗石三保應之副將伊薩納永綏同知彭鳳堯率兵往捕鎮筵總兵往會鎮筵苗吳半生及乾州三岔山苗同時蠶集官兵大敗永綏乾州鎮江皆陷詔雲貴總督福康安四川總督和琳合兵剿之福康安進勦招撫貴州苗略定總兵福寧攻乾州苗大敗賊勢大振苗魁吳八月據平隴稱吳三桂後妖煽遠近遂

續一八史卷之五

六十四

嘉慶帝

荊州賊起

稱吳王石三保石柳鄧皆附之○英吉利使臣入貢言前歲大將軍率兵征西藏西南的密部即鄂爾喀時彼國兵船亦曾相助倘嗣後有需用西洋兵者情願效力○上傳位于皇太子在位六十年改元者一曰乾隆以嘉慶四年正月崩皇太子即位是為仁宗睿皇帝
仁宗睿皇帝諱永琰高宗第十五子也○丙辰嘉慶元年上尊高宗曰太上皇帝○荊州杖江宜都聶傑人張正謨等賊起先是縣官以勘理教匪逮捕株連羅織至數萬人破家陷死無算而川湖粵貴民方以苗事困軍興又以嚴禁私鹽私鑄失業者已多至是民益饑官思亂教匪乘機

續十八史卷之五

六十五

四川賊起

煽動蔓延河南陝川甘肅官兵前後殺賊不下數十萬而賊起益熾○四川蜀其清徐天德等賊起各擁眾數萬肆掠郡縣○額勒登保等會兵合剿苗賊斬石柳鄧湖貴畧定○兩廣總督吉慶獲海盜陳天保帶安南總兵印安南國王阮光纘令劫內洋商船以濟兵餉也○丁巳二年明亮赴達州額勒登保赴湖北俱討川賊○川賊王三槐敗走雲陽將與白崖山陳家山二賊合羅思舉以鄉勇繞出前途獲賊謀悉知其計即冒所獲賊白旂夜馳抵陳家山掩擊賊巢禽斬四千餘雲陽新起賊一舉除之至是補夔州左營千總先是游擊羅定國使思舉偵賊豐城還報請

鄉勇羅思舉

以一夫走數萬

率死士夜襲其巢而伏官兵五百為外應夾擊可一舉滅賊軍中咸狂之且謂間諜思舉憤官兵養賊乃請火藥數觔夜獨往賊寨深入縱火風烈火熾賊自相蹂殺謹諫震天奪路走顛崖踏死無算弃器械牲畜山積是役以一夫走賊數萬名震川東鄉勇從之者如歸思舉因險出奇以少破眾長劫營長用伏長用間軍中號曰羅必勝言晦夜劫營必勝崖溝間道必勝冒旂誘敵必勝也○戊午三年額勒登保誘執王三槐於雲陽餘黨冷天祿猶負岷安樂坪大兵環攻三月不下思舉請劫賊寨梯絕壁上縋引死士千餘入其三柵乃縱火深巢皆黑橫突萬眾中將明殿

續一八 史略續編卷之五

六十五

旅出寨大呼曰吾豐城劫寨羅思舉也賊膽落潰奔官兵
邀斬無算川東賊由此不振○獲羅其清於山碕○巳未
四年鎮堂黑苗吳陳受眾數千犯邊詔責巡撫姜晟嚴獲
首賊自明亮額登保班師諱奏用兵諸苗至是始奏以鳳
皇廳同知傅萬總理邊務募勇修碕悉力禦之○庚申五
年鎮堂驍苗出掠瀘溪即夜三路搗燬其巢殲之○安南
舊阮王與新阮交兵禽送海賊莫扶觀等皆內地奸民受
安南偽封東海王及總兵○教首劉之協被禽于河南檻
送京師御製邪教說以治從逆不治從教之旨宣示中外
○額勒登保追陝賊高馬等由棧道入隴乃遣楊遇春擊

治從逆不
治從教

汧隴之賊遣穆克登布擊秦川之賊分兵扼棧道高馬等
眾二萬夜襲徽縣將軍富成敗死高馬復犯略陽沔縣西
鄉總兵札勒杭阿提督王文雄先後戰死恒瑞擊馬學禮
徐天德于康安額勒登保自漢中進軍西鄉策應楊遇春
遣兵斷二賊之援先攻馬賊禽斬千餘徐天德走金河口
由安康渡漢猝遇官軍于漢陰即東走○夷艇三十餘偏
台州將登岸泊松門山下颶風雷雨大作賊船撞破覆溺
殆盡獲安南偽候倫貴利等皆磔之會安南為農耐王阮
福映所滅新受封守朝廷約束盡逐國內奸匪由是艇賊
無所巢穴其在閩者皆為漳盜蔡牽所并牽同安人奸猾

能使其眾勢大猖獗。凡商船出洋者，勒稅番銀四百圓。回船倍之，乃免劫。浙江巡撫阮元，令李長庚赴閩造大艦三十名，曰靈船，鑄大礮四百餘，配之以備海寇。○辛酉六年，楊遇春生俘賊首王廷，詔檻送京師。高馬二賊與川賊陳魏顏辛等竄西鄉，窺江寧。額勒登保遣慶成、札克塔爾兩路迎擊，先後禽斬千餘。楊遇春禽高馬二賊于大寧之二郎壩，俘斬殆盡。○壬戌七年，諸將日夜追剿，寇賊猶未蕩平。上切責其老師持久，降謫有差。而暑雨時行，山潦暴漲，兵與賊皆不能進。額勒登保、德楞泰、楊遇春皆病。詔額勒登保回京，以欽差大臣關防交德楞泰剿賊于川陝界之

苗搖之亂
九載始平

鳳皇寨。先是詔懸賞購賊，賊黨趙洪周聞購，乘間斬賊首苟文潤出降，餘黨解散。乃令楊遇春、賽冲阿入山搜捕，楊芳搜漢北，豐紳馬瑜、田朝貴分搜川境，先後禽斬無虛日。會寨勇禽賊苟朝九于南鄭，羅思舉禽王世貴于太平。各路皆報肅清。九月，班師自賊起事，至報勘定，計先後用兵九載，費帑銀幾二萬萬兩。所奏殺賊數十萬計，而官兵鄉勇之陣亡與五省民之罹毒者，無得而稽焉。○癸亥八年，海盜蔡牽竄定海，浙江提督李長庚掩至，牽逸至閩。洋賊糧硝盡，蓬索朽，我師又據上風，賊不能遁，乃偽乞降以緩我師，牽得間繕檣械，備糗糧，揚帆去。浙兵追擊，大敗之。賊

海盜蔡牽
掠臺灣

畏霆船厚賂閩商更造大于霆船之船載貨出洋渡臺灣
○甲子九年蔡牽掠臺灣米數千石分濟粵盜朱瀆連艦
八十餘入閩會浙江總督胡振聲擊之為賊火攻所陷死○八月
于閩閩督玉德遽檄振聲擊之為賊火攻所陷死○八月
蔡牽朱瀆共犯浙李長庚合諸鎮兵擊之于定海北洋二
賊結百餘艘為一陣長庚督兵衝貫其中斷賊為二使鎮
兵擊瀆而已急擊牽逐至盡山沉其二船又斷其坐船蓬
索會風雨驟起賊遁去牽責瀆不用命瀆怒遂與牽分是
冬長庚敗瀆于甲子洋○乙丑十年蔡牽以百餘艘犯臺
灣沉舟鹿耳門以塞官兵結土匪萬餘攻府城自號鎮海

南山新兵
作亂

王○南山起隴西尾商郎阻奧千餘里置寧陝鎮節制之
七年寇賊戡定之後以從征鄉勇五千充新兵地險兵悍
為漢北第一雄鎮是年六月屆減給期副將楊之震遇兵
士詐者不曉諭輒笞治于是左右二營兵陳達順陳先倫
謀變糾黨二百餘焚掠二城戕副將游擊以叛賊黨蒲大
芳等以總兵楊芳得士心先護送其家屬于興安而後歸
從賊是時楊芳赴圍賊煽脅各汛汛讀新兵八黨欲由棧
道南走川西七盤關及川北皆有官兵廼奔華陽破洋縣
虜脅二千餘復回寧陝轉攻萃義分隊窺子午峪上責德
楞泰擁兵不進致賊橫行日鳴張時賊起事頭目百四十

續十餘卷詩本卷之五

七

人各招黨羽。每人所招或百餘或數百。旬月萬計。又選其能戰之賊。步騎三千為前鋒。以陣先倫陣。達順不得衆心。改推蒲大芳為首。群賊皆聽指揮。大芳驅群賊大破官軍。欽差大臣扎克塔爾陝西提督楊遇春等皆走。楊芳馳至單騎入賊營。說大芳降之。其叛卒二百餘人盡釋歸。伍于是新兵之亂平。上震怒。責其專擅廢法。縱叛損威。命總督倭什布謫科布多。扎克塔爾降四川副將楊遇春降寧陝鎮總兵成。其降卒二百于新疆。即回疆天南路也使楊芳率降卒出關戍。○粵賊李崇玉與艇賊通官捕急。逸于海船。兩廣總督那彥成誘禽之。給五品頂戴。招降洋匪三千餘皆

釋之。于是民間有為民不如為盜之語。召那彥成還。以吳熊光代之。○丙寅十一年。李長庚攻蔡牽于臺灣。焚獲三十餘艘。俘賊千餘。牽困守北汕。如獸在阱。會風潮驟漲。北汕所沉舟為風浪掀起。漂去。牽乃遁去。長庚追及粵洋。殲牽姪蔡天來之船。○丁卯十二年。十二月。長庚追牽入澳。窮其所向。至黑水外洋。牽僅存三舟。長庚擊破牽船蓬。又自以火攻船。維其後艙。賊急發艙尾一礮。適中長庚喉。而殞。牽乃遁入安南。夷海事聞。上震悼。追封壯烈伯。謚忠毅。以長庚裨將王得祿邱良功嗣其任。○戊辰十三年。蔡牽自安南回棹。朱濱資之。與閩盜張阿洛相應。巡撫阮元用

海盜蔡牽死

間離之濱復舍牽竄閩為許松年斃牽亦為浙兵破其黨
 駱亞盧殲于邱良功于是阿治牽眾乞降邱良功王得祿
 合剿牽於定海牽窮知無救乃首尾舉礮自裂其船沉海
 而死○安南阮福映于七年攻復其全境遣使入貢備陳
 構兵始末為先世黎氏復讎其舊封農耐本古越裳之地
 今兼并安南不忘世守乞以越南名國詔封越南國王初
 安南惡鴉片烟天主教久絕其市舶是年英吉利駐印度
 兵首聞阮邦新造釁可乘乃以兵艦十餘駛入富良江口
 安南人盡斂舟藏內港數百里無一人直抵東都夜忽小
 舟百一出下流內港乘風潮火攻之英人無走路先入七

英吉利攻安南

艘燼焉其海口餘艘駭遁無顏返國乃抵廣東圖占澳門
 不果而去○己巳十四年百齡代吳熊光督粵嚴禁岸奸
 接濟又盡改海運為陸運賊乃撥小船入掠內河鄭乙以
 三百餘艘入掠香山大黃埔總兵許廷桂敗死百齡調兵
 內外夾攻賊突圍遁尋死其妻代領其眾粵賊郭學顯以
 眾五千船九十餘出降○庚午十五年鄭乙妻詣省城乞
 降乃獻其眾萬六千船二百七十礮千餘載至香山海口
 百齡親往受之赦令隨軍自贖乃檄各鎮會剿餘賊各率
 所部出降粵賊平○上諭群臣曰國家經理大事當扼其
 要領譬治病當究其病源如剿教匪則堅壁清野為要靖

洋匪則杜絕岸奸為要○辛未十六年上西巡幸五臺山

李文成謀

○癸酉十八年上幸木蘭秋獮○河南滑人李文成及直

天里教徒

隸大興人林清謀逆並伏誅初文成倡天里教亦名八卦聚

眾歛財妖煽其徒文成黨數萬最盛而清則密通京師陰

通內臣約乘上回鑾時伏莽行在滑知縣強克捷聞知之

密告巡撫高杞請兵掩捕不應克捷乃捕文成下獄賊黨

遽聚眾破滑出文成于獄克捷死之於是直隸山東之賊

黨皆起殺官陷城林清亦使其黨犯京城太監劉金閣進

喜等為內應引賊入大內皇子等在上書房聞變皇次子

急命進撒袋銃刀俄有手白旗攀垣將踰入者皇次子發

銃殪之再發再殪貝勒綿志亦以銃殪賊賊乃不敢越垣

而入將火隆宗門諸王大臣率禁兵入衛敗賊薄暮忽大

雷電數賊震死餘股栗竄匿先後就禽并禽通賊諸內監

飛報行在越四日車駕還宮人臣始定焉文成既據滑萃

精銳于道口恃運河積糧以戰守陝西提督楊遇春連敗

賊巢進圍滑城桃源賊首劉國明潛入滑護李文成出奔

輝縣山總督那彥成遣兵追之文成自焚死尋滑城亦下

殲賊二萬餘俘賊首牛亮臣徐安國等滑縣平山東鹽運

使劉清故在四川將鄉兵剿賊有名至是以文吏將官兵

連破山東諸賊平之豫親王以先期聞賊黨祝顯逆謀不

舉發削封爵以強克捷首發賊功賜謚忠烈世襲輕車都尉○甲戌十九年南山木商夫役萬二以歲饑停工出鄉掠食吏捕之萬二煽眾入山巡撫朱勳遣吏講解萬二益恣眾至數千燒木箱命那彥成等會剿禽斬萬二餘賊悉平○乙亥二十年川西徼外中瞻對番酋作亂重慶鎮總兵羅思舉討平之○庚辰二十五年南路參贊大臣斌靜荒淫失回眾心張格爾故回首大和卓博羅尼都之裔也薩木克逃匿教罕有三子次即張糾布魯特數百寇邊有頭自蘇蘭奇入報為章京綏善叱逐蘇蘭奇憤走出塞從賊領隊大臣色普徵額率兵敗之張格爾僅餘二十餘賊

張格爾擾回疆

舍騎步道○上崩在位二十五年改元者一曰嘉慶皇子即位是為宣宗成皇帝

道光帝

宣宗成皇帝諱昊寧○乙酉道光五年張格爾屢寇喀什噶爾近邊時內地回戶多為其耳目官兵往捕輒遁領隊大臣色彥圖以兵出塞四百里拚之不遇即縱殺游牧之布魯特妻子百餘而還無復行列其酋汰列克大怒率所部二千追覆官兵于山谷張格爾率五百餘突至回城拜其先和卓木之墓距喀城八十餘里將軍慶祥遣兵五千剿之先後戰沒東走阿克蘇者僅七百人赦罕酋將兵萬餘援張格爾喀城遂陷英吉爾葉爾羌和蘭亦陷命陝甘

總督楊遇春馳赴哈密會諸軍進剿詔伊犁將軍長齡為揚威將軍山東巡撫武隆阿率吉林黑龍江兵會剿賊福阿克蘇城辦事大臣長清遣兵敗賊禽斬千餘大兵集阿以其眾二千縛獻偽帥○丁亥七年太兵進抵洋阿巴特沙漠平曠賊二萬據橫岡長齡楊遇春將中軍武隆阿左楊芳右三路進攻奪橫岡賊潰奔禽斬其半復沙布都爾城禽斬萬計追至洋達瑪河距喀城十餘里賊悉其眾十餘萬背城列陣亘二十餘里夜二鼓西南風起撼木揚沙大霧晦長齡欲退營楊遇春不可曰天贊我也即自率親

捷
楊遇春洋
達瑪河之

兵據上風扛礮轟賊礮聲與風沙勢相并若百十萬兵摧壓驟至賊陣大亂比曉我兵盡渡河乘勝復喀城張格爾已遁僅獲其甥姪及安集延偽帥等殺賊無算生禽四千餘遂復英吉沙葉爾巷尋復和闐楊遇春楊芳追賊出寨楊遇春屯色勒庫楊芳屯阿賴阿賴葱嶺之背水皆西流乃喀城赴教罕之道也教罕兵二千餘來圍楊芳鏖戰一晝夜軍幾殆步步為營嚴陣出險于是長齡武隆阿頓師不進上切責老悖昏謬欲釋逆裔歸長舊部二人俱革職留任命直隸總督那彥成赴回代長齡時張格爾傳食諸部諸部頗厭之長齡等密遣回民縱反間言官兵全撤喀城空虛諸回翹首以望

禽張客爾

和卓張格爾果復率賊五百潛襲喀城長齡楊芳等要擊禽之于喀爾鐵蓋山檻送京師長齡檄諭教罕布噶爾

爾在教罕之西縛獻逆裔家屬教罕遣使來賀而不獻逆裔家屬

于是上命絕其互市以困之○已丑九年教罕安集延流

寓各夷糾眾萬餘攻圍喀什噶爾葉爾羌焚掠回莊那彥

成之子容安以伊犁參贊大臣領兵赴援軍抵阿克蘇畏

賊不敢進繞道烏竹致賊飽颺出塞逮下獄擬重辟那彥

成亦革職以長齡為欽差大臣同楊芳哈朗阿馳至軍與

伊犁將軍王麟會審邊事○辛卯十一年檄諭教罕復許

入貢通市○移喀什噶爾參贊大臣駐葉爾羌

教罕為眾夷連逃藪

所屬不過八城安集延即其八城之一在教罕東三百八十里距喀城五百里○湖南永州錦田

平蠱之亂

猺趙金龍與常寧猺趙福才以平蠱惑其眾時楚粵奸民

結天地會屢劫猺寨牛穀黨聯官役猺無所愬于是金龍

妖煽其黨倡言復讐使趙福才糾廣東散猺三百餘合湖

南九冲猺共六七百人焚掠兩河口殺二十餘人○壬辰

十二年趙金龍眾已千餘據長塘夾冲永州鎮總兵鮑友

智調兵七百永州知府李銘紳桂陽知州王元鳳各募鄉

勇進剿游擊李方玉王俊等直搗夾冲遂燬其巢斃賊三

百餘金龍竄藍山之五水猺山所至虜脅眾二三千提督

海凌阿率副將馬鞞以兵五百進剿藍山路險冒雨深入

伏賊四起。乘高下突。海凌阿等皆死。于是金龍福才及趙文鳳各擁眾二三千。犄角出沒。桂楊知州王元鳳等擊斬福才。新田知縣王鼎戰沒。賊入城市掠去。扼洋泉鎮拒官兵。總兵羅思舉等以兵攻圍。金龍中鎗死。餘黨趙子青以賊二千竄江華。羅思舉余步雲等禽斬子青。餘黨瓦解。○連州八排。獠作亂。總督李鴻賓同提督率兵六千三路進剿。獠剽要路。伏隘狼突。官兵驚潰。三路皆敗。士卒死者千計。禧恩瑚松額余步雲等進剿降之。○己亥十九年。以林則徐為總督。赴廣東嚴禁鴉片。並罷貿易。先是以鴉片烟甚害民生。已設嚴禁。乾隆嘉慶兩次消燬。數千函以示其

連州狂亂

林則徐燬鴉片

為害。又設立制律。警戒防遏。而流毒不息。禁網漸弛。遂至比歲所販數萬函之多。上憂其耗盡中國。日久愈甚。特命則徐便宜從事。則徐至廣東。命英商盡呈所蓄鴉片。嚴張兵備。臨之。英商懼呈千餘函。則徐責未盡其數。英商抗辯不服。則徐乃命內民絕輸送飲食。以困之。英商窮窘。遂盡其數。送呈。則徐即盡消燬之。又復諸蕃互市。惟英人不允。于是英人以戰艦駛入廣東。乞曰復互市。則已否。若有戰耳。則徐不應。英人乃寇我官船而去。則徐恐其再寇。大修兵備。適洋中有伊斯把你亞船。我兵疑為英船。襲燒其船。英人馳往救難。英將蘇密多以戰艦至廣東。我兵進剿。失

英國發戰艦數十艘來攻

擒英女酋

利尋寇香港我兵拒戰互有勝敗英人遂乞互市不許○
 庚子二十年英國發戰艦數十艘來襲舟山乍浦取之今
 路侵浙東郡縣遂圍寧波命大臣伊里布為大將軍赴浙
 東禦之于餘姚縣英艦膠沙不前鄉勇蝟集攻圍有女酋
 驍勇絕倫挺身防戰手斬數人鄉勇披靡一人揮槍自後
 引其肩眾因得禽之并捕獲英兵二十餘人女酋其國王
 第三女云英將寄書餘姚縣令請撫俘即還侵地直至廣
 東奉法令不報遂至京師乞和上命欽差大臣琦善赴廣
 東議之○廓爾喀遣人稟駐藏大臣言小國與里底所屬
 之披楞地相鄰每受其侮今聞里底與京屬構兵臣願率

所部往攻里底屬地以助天討時駐藏大臣未知所稱里
 底即英吉利披楞即英吉利屬地東印度孟加臘也邵之
 ○辛丑二十一年命欽差大臣伊理布同琦善赴廣東議
 和英將曰還我公主即還侵地如不許則傾國大舉誓必
 報復琦善等私斷行釋放禡林則徐職于是英將撤浙東
 兵而駐廣東悉奪蕃館兵勢猖獗上大怒奪琦善伊里布
 職起用林則徐經理浙東命親王綿瑄為大將軍統師赴
 廣東英將恐其襲擊棄蕃館入船官軍進剿戰于海上失
 利英兵遂登岸復蕃館我兵進勦不克英將乞我退兵于
 六十里外得償銀六百萬兩以罷兵許之乃退兵如約英

兵亦引去時英國東印度屬地鎮將噶嗎啞等奉公主命以兵三萬二千餘至澳門英軍大振廣州府戒嚴修築城堡以為守備英兵礮擊其運土石船沉之又破岸上廬舍去尋陷香港廈門進拔定海鎮海遂陷寧波據之○壬寅二十二年官兵復寧波不克又襲定海鎮海俱失利英兵大舉拔乍浦陷上海進陷吳淞水師提督陳化成死之化成材勇善戰所至築砦鑄礮連立軍功英軍語曰不恐江南百萬兵惟怕一人陳化成英兵破橫江鐵鎖關進我兵七萬餘松江列營拒之英兵水陸突衝直逼鎮江將軍齊慎宵遁副將祥雲海齡等死之府城遂陷南京大震報聞

英將據寧波
陣化成戰死

上始知其不可防遂起用伊里布同欽差大臣耆英馳赴講和英兵乘勝進至燕子磯距江寧府僅三十里耆英等至即遣使議和○七月耆英等會英將噶嗎啞于江寧府定議乃為盟約書其畧曰清國消滅烟土納銀二千六百萬兩償之以廣州福州寧波廈門上海五處為英國交易之區使家眷來住香港永歸英國管轄清英官吏以同等交接○布噶爾伐教罕滅之虜教罕王子伯克來告捷布噶爾國在教罕之西尤大且強先是布噶爾王挾教罕王之弟以女妻之且夕伺釁是年遂滅教罕為其附庸○英船過臺灣遭風破碎土人疾英人犯順有年見之宿憤忽

布噶爾滅教罕

與英講和

發四集擒捕鎮總兵洪達等命殺之。僕噶渣上疏曰：如此而無罪，則某將執干戈以問之。即解洪達等職，命耆英謝之。○丁未二十七年，廣東之民怨英人特甚，每以細故爭鬪，糾眾抗拒。至是，廣民悉逐英人。英國香港鎮將潛遣戰艦數艘襲廣東城，皆取之。總兵官馳至香港謝英將以復侵地，并許英國備戰艦于港口以戒黨匪。○庚戌三十年，洪秀全、楊秀清、馮雲山等在金田作亂。秀全，廣東花縣人，奉天主教，喧傳天父、天兄之語，欺誘頑民，密結秀清、雲山等，遂謀不軌，俱往金田。集其徒三百餘人，搶掠鄉鎮，官兵圍急，將就擒。適廣東教匪楊元清等以亡命三千人附之。

天主教徒
亂
長毛賊

勢遂猖獗，偽號太平天國，稱天王秀清。廣東嘉應州人嘗與其徒蕭朝貴、婁宣嬌私聚，至不及避，乃謂眾曰：我為天父，四子宣嬌為天父六女，今同臥，以為天下兄弟姊妹贖病也。同胞兄妹同臥，何害？眾勿疑，遂自號贖病主，目不識丁，而多權詐，賊悉聽其指使。雲山，廣西潯州桂平人，稍讀書，與秀全接，恨見之晚，遂相與密結，造十天條。太平軍自太平禮制，天父詔書等書，惑眾用兵，詭譎幾於不測。○上崩，在位三十年，改元者一曰道光。皇子即位，是為文宗顯皇帝。

咸豐帝

文宗顯皇帝諱奕訢。○辛亥，咸豐元年，官兵征勦賊洪秀

長毛賊用龍口法拔城

長毛賊陷南京據之

全等破之賊竄入永安○壬子二年官兵圍賊洪秀全等于永安值湖南郴州人李嚴通作亂為官兵追勦逃附永安秀全等始突圍出遂擾桂林一帶竄至長沙先是湖南多盜賊官兵分勦至是悉附秀全有賊一萬人又招得掘煤洞蠻子數百人始用龍口法龍口法拔地道以崩地之法也長沙以前尚未能陷城至是用此法長沙城幾陷官兵力戰破之斬賊魁蕭朝貴賊乃退轉主武昌用龍口法城陷賊勢大振○癸丑三年粵逆洪秀全楊秀清等率賊眾數萬順流東下悉陷沿江郡縣遂攻金陵以龍口法拔北城官兵殊死拒戰婦女亦登陴助守礮銃電發斃賊無算賊眾有增無

妓女死節

減而官軍連日不暇食大城乃破官吏將士皆殉難秦淮兩岸青樓有妓王某女賊逼與歡女笑迎曰妾等以陋質得侍大王何修而獲此顧家有酒饌盍飲以合歡賊喜諾大嚔醉女抽刀殺賊而後自縊於樓賊遂陷城秀全入居之偽號王府置偽文武官又設男女館逼人拜天父言敬天兄耶蘇耶蘇西方之聖人也西方諸國信奉最篤而辯之甚明耶蘇為天父之第一子秀全為第二子南賊馮雲山為第三子東賊楊秀清為第四子北賊韋昌輝為第五子西賊蕭朝貴婦楊宣嬌為第六女翼賊石達開為第七子餘雖其父兄子孫皆為該賊等之弟其母嫂姊女皆為

該賊等之妹又出南賊所做讚美率眾朝夕誦之又每茶飯先默誦小子跪在地下敬謝天父等語夕睡朝起亦有所誦更謂天父七日造成天地山海人物每閱七日為一讚期街設大旗寫明日禮拜各宜虔敬三更具菓品糕點群誦讚美鑼聲炮聲震耳老長毛謂洪秀全病具奏章寫小子跪在地下等語著人代祈其言甚哀其煽惑愚頑率皆因此賊眾遂進陷鎮江揚州時賊眾男女館約二十三萬四百名○廣州府吏捕廣人在英船傭役者英人拒之府吏怒燒其館英將發兵擊破諸砦遂燒廣州城上遣官馳赴與償金以和○丙辰六年廣人奪掠英商船英官訴其暴

英佛二國
來寇

舉官吏輕視不理英將發兵擊廣東諸砦官軍嚴守備拒之自是連年與英構兵○戊午八年英吉利佛蘭西二國兵來寇廣東轉入北河北河在直隸天津江下流也擊破諸砦直至天津上懼其侵入北京命穆親王等抵天津講和二國請以開天津及諸港互市弘耶蘇教於中國官保護奉其教者許二國公使在留北京等事穆親王錄其所請還京以聞于是英佛二國兵亦引去○已未九年英佛使臣至天津問前年請船入北河我兵礮擊斃數十人二國使臣僅以身道○庚申十年英佛兵二萬餘至北河口上命大臣僧格林沁統大兵拒之與二國兵戰于河口破之英軍揚休

戰旗以緩我軍而分兵繞出我後來攻大兵拒戰不利因亦揚旗放俘以休戰敵不肯休戰急進衝陣陷大沽我兵遂失沿河守僧格林沁遣使講和引英將至天津英將曰開天津等諸港及得償金八百萬兩尋二國兵悉至天津營又英將逼天津府告示該地屬二國事建二國旗章于城門既而英軍復向北發我兵逆戰大破之生擒英將及其兵眾英佛精兵一萬餘萬礮電擊奮進我兵力戰遂不能拒相率奔潰上大驚率后妃及諸王北幸熱河命皇弟恭親王留守京師時二國兵已逼北京恭親王急馳使議和英將曰放俘修盟之報期以三日而若逾期不得其報

與英佛和

則直衝北京城恭親王報逾期不至二國兵進入北京營大清門外縱火燬夏臺及圓明園至是英將寄書求和恭親王乃放其俘虜引英佛二將入城於禮部廳修盟書其略曰償金一千二百萬兩俱與英佛二國以牛莊登州臺灣潮州瓊州九口漢口等處為交易居留之區和議乃成英佛軍引去○以黑龍江北地二千七百里與俄羅斯購礮○辛酉十一年上崩在位十一年改元者一曰咸豐皇子即位是為穆宗毅皇帝

續十八史略讀本卷之五

續十八史略讀本卷之五終



版權免許

明治九年
八月廿四日

著述人

愛媛縣士族

宮脇通赫

第四大區一小區
表神保町一番地

出版人

東京府平民

山中市兵衛

第二大區五小區
芝三嶋町十番地

東京

書林

須原屋茂兵衛

山城屋佐兵衛

須原屋伊八

坂上半七

小林新兵衛

和泉屋吉兵衛

和泉屋金右衛門

東京

書林

椀屋喜兵衛

藤岡屋慶次郎

出雲寺萬次郎

朝倉屋久兵衛

和泉屋市兵衛

和泉屋孝之助

和泉屋北郎

